

城郭記下

天山北路

車師後國

漢車師後國

今阜康縣境

治務塗谷

唐謂浮圖城務塗音之轉訛也

西南至都護治所一千二百三十

里武帝破姑師始分置其國戶六百北與匈奴接叛服不常平帝元始中車師後王國有新道出五船北通玉關往來差近戊己校尉徐普欲開道以省道里

避白龍堆之厄車師後王姑句

音鈞

以道當爲拄置心不便也

師古曰拄者支拄也言有所置立而支拄

於己故心不便也劉廠曰拄置猶言儲侍

地又頗與匈奴南將軍接普欲分明其界召姑句使證之不

肯擊之姑句與其妻謀遂馳突出高昌壁

車師前地

入匈奴又去胡來王唐兜國

比大種赤水羌數相鬪告急都護但欽不以時救唐兜怨欽東守玉門關不訥即將妻子亡降匈奴單于受之遣送到國漢使以聞帝怒命會西域諾國斬以

示之建國二年車師後王須置離復謀降匈奴都護但欽收斬之其弟狐蘭支復將二千人亡入匈奴時王莽易單于璽單于怒遂受狐蘭支降遣兵共擊車師殺後成長車師小國傷都護司馬戊己校尉刁護遣陳良屯桓且谷備匈奴寇自後良等謀殺刁護盡協校尉吏士降南將軍而匈奴大寇北邊西域亦瓦解建武中皆遣使求內屬願請都護光武不許諸國更相攻伐郁立單桓狐胡烏貪訾離爲車師所滅永平十七年夏漢詔竇固耿秉合兵出白山擊車師後王時前王即後王之子其廷相去五百餘里固以後王道遠山谷深士卒寒苦欲攻前王秉議先赴後王以爲并力根本則前王自服乃奮身引兵先入衆軍並進後王安得震怖從數百騎出迎其前王亦歸命漢始置戊己校尉以耿恭爲戊己校尉屯後部金蒲城前漢書金蒲城後漢書金蒲城案金蒲即金滿今□□府屬之濟木薩境明年三月匈奴左谷蠡王擊車師殺後王安得進攻金蒲城恭以疏勒城傍有水可圍乃引兵據之七月匈奴來攻圍疏勒城案疏勒城即後王所屬當附近金蒲城城名疏勒與疏勒國無涉舊史皆指屬疏勒國誤遂於城下擁絕澗水

城中渴乏穿井十五丈不得水恭整衣冠拜井拔刀刺山飛泉湧出恭以示賊
賊驚退其冬車師亦叛與匈奴共攻恭恭厲衆擊走之

後漢書後王夫人先世漢人常私以虜情告恭又給以糧

餉數月食盡袁鎧努食其筋革恭推誠同死生士無二心而稍死亡匈奴知恭困遣使招恭降恭誘其使上城手擊殺之

建元初年敦煌太守段彭等

率兵擊柳中北虜驚走時關寵已沒諸將欲引兵還諸羗固請乃分兵二千人
從山北迎恭遇大雪軍僅能至城中恭隨俱歸發疏勒時尙有二十六人隨後
死沒三月至玉門唯十三人自是迎還戊己校尉和帝永元二年竇憲擊北匈
奴車師震懼前後王復遣子入侍明年置戊己部候居車師後部八年長史王
林發兵討後部王涿鞮涿鞮入匈奴漢軍迎擊斬之乃立涿鞮弟農奇爲王元
初六年長史索班屯伊吾數月匈奴率車師後王軍就攻沒班等繼又叛殺後
部司馬

司馬即屬戊己校尉所統也

延光四年班勇發鄯善諸國兵擊捕軍就及匈奴使者將

至索班沒虎斬之率農奇子加特奴及八滑等擊破呼衍王於是立加特奴爲

後王八滑爲後部親漢侯冬單于自將萬騎人後部至金且谷司馬曹俊救之

單于引去陽嘉初加特奴擊北匈奴於闐吾陸谷自是車師無復虜跡永興二年後部阿羅多與戊部侯嚴皓不相得遂叛攻嚴屯田且固城殺傷吏士後部侯炭遮領餘人叛阿羅多詣漢吏降阿羅多卒百餘騎亡走北匈奴中漢立故王軍就質子卑君爲後部王阿羅多復從匈奴中還與卑君爭國戊己校尉閻詳慮其招引北虜乃許復爲王阿羅多詣詳降於是更立阿羅多仍將卑君還敦煌以後部人三百帳帳猶戶數也別役屬之案西域古蹟惟李廣利懸泉及耿恭拜井爲最著拜什噶爾皆彙集車師後部事始悟恭爲戊己校尉守車師後國未曾到疏勒拜井在疏勒城城雖名疏勒實屬車師後國之地就耿傳後王夫人常以虜情告恭又給以糧餉旬後王夫人豈有越數千里而告之給之耶羌從山北迎恭恭拜疏勒城疏勒國豈在山北邪正月疏勒城回三月即至玉門正與今迪化至敦煌行期亦合因附記之

烏貪訾離

欽定西域圖志烏貪訾離與今烏魯木齊音猶相近

漢烏貪訾離國治于婁谷

今特納格爾在阜康縣西北

西南居都護治所一千二百里東與單

桓南與具彌西與烏孫接蒲類木東陞其王茲力支降都護分車師後王之西爲烏貪訾離地以居之單桓國在東南戶二十七

西蒲類

漢西蒲類今迪化州竟治天山西天山指今博克達鄂拉踰疏榆谷在卑陸且彌西西南至都護

治所一千三百八十里後漢書東南去長史居一千一百二十里廬帳而居逐水草頗知田作蒲類本

大國也前西域屬匈奴而其王得罪單于單于徙蒲類人六千餘口內之匈奴

右部阿惡地因號曰阿惡國南去車師馬行十餘日人口貧羸逃亡山谷間

故留爲國又西二百六十里其後國也三國時謂之蒲陸後國今昌吉縣境

案天山脈自葱嶺西來聯屬不斷至托克喇鄂拉勢若停蓄折而北行南北迤邐百餘里是爲博克達鄂拉漢書於西蒲類曰天山里於且彌曰天山東天山者蓋指今博克達鄂拉言也

移支

後漢移支國居蒲類地今綏來縣境戶千餘其人勇猛敢戰以寇抄爲事皆披髮隨

畜逐水草不知田作所出皆與蒲類同

東蒲類

漢東蒲類國今鎮西廳境屬匈奴右賢王地有蒲類澤師古曰近蒲類國去長安六千餘里案蒲類澤令巴爾庫勒淖爾舊音巴

里宣帝本始中五將出塞以趙充國為蒲類將軍應劭曰諸將分部充國當與烏

孫合擊匈奴蒲類澤烏孫先期至而至漢兵不與相及充國出塞一千八百里

西 侯山斬首捕虜得裨陰匈奴傳作蒲陰王以下八百餘級又三年常惠將兵與烏

孫人匈奴右地於是蒲類王得罪單于單于怒徙之阿惡地而茲力支者降漢

都護都護居之後王之西後漢稱西蒲類蒲類既遷匈奴呼衍王入居其地後漢永平

中竇固至天山擊呼衍王章懷太子曰天山在今西州交河縣東北呼衍王走追至蒲類海章懷太子曰蒲類海在今庭州

蒲昌縣東南一名婆悉海案婆悉海即蒲昌海唐蒲昌縣因海以名在交河之南蒲類海在天山北章懷注誤明年破白山虜遂降車師耿秉傳秉合兵出白

山擊車師後王又班超傳命將師擊右地破白山臨蒲類取車師城郭諸國遂開西域置都護永元三年竇憲復出河西會北單于為

南匈奴所破被創遁走憲追至私渠海而還憲以北虜微弱欲滅之復遣耿

夔為大將軍將精騎八百出居延塞甘肅志括地志居延海在張掖東北一千五百里新唐志合犁山傍河東北行千里有寧寇軍軍東北有居延

海元志亦集乃路在甘肅州北一千五百里城東北有大澤西北俱接沙磧乃漢西海郡居延故城直奔北單于金微山大破之單于與

數騎脫亡右鹿蠡王於除鞬復自立為單于眾八部二萬餘人來居蒲類海上

遣使款塞帝以耿夔爲中郎將持節衛護之陽嘉中北匈奴呼衍王侵車師後
郭敦煌太守發諸國兵及玉門關侯伊吾司馬合騎掩擊北虜於勒山後漢西域傳索班已

沒敦煌太守張當上言北虜呼衍王常展轉蒲類泰海之間專制西域今以酒泉屬國吏士二千餘人集昆崙塞先擊呼衍王絕其根本因發鄯善兵脇車師後王此上記也漢軍不利

秋呼衍王復攻車師後部破之桓帝元嘉元年呼衍王寇伊吾伊吾司馬毛愷遣五百人於蒲類海東與戰悉爲所沒遂進攻伊吾屯城敦煌太守馬達將敦煌酒泉屬國吏士四千餘人救之出塞至蒲類海呼衍王聞而引兵去自後無聞

烏孫

漢烏孫大昆彌治赤谷城漢書溫宿傳西北至烏孫赤谷六百里案赤谷今伊犁西呼巴海達巴東至都護治所千七百

二十里西至康居蕃內地五千里師古曰居音集案康居今哈薩克地莽平多雨寒山多松櫟田

作種樹隨俗逐水草與匈奴同俗國多馬民剛惡無信多寇盜最爲強國故服

匈奴師古曰故謂其舊時也東與匈奴西北與康居西與大宛南與城郭諸國相接本塞地

也師古曰塞即釋後世音重而義同

大月氏

案月氏本居敦煌南

西破走塞王塞王南越縣度

西國山名

大月氏居

其地後烏孫昆莫擊破大月氏大月氏西臣大月而烏孫昆莫居之故烏孫民有塞種有大月氏氏種云始張騫言烏孫本與大月氏共在敦煌間今烏孫雖彊大可厚賂招令東居故地妻以公主與爲昆弟以制匈奴武帝即位令騫齎金帛往時昆莫有十餘子中子大祿彊善將將萬騎別居太子子曰岑陁太子早死以岑陁爲太子昆莫與萬餘騎亦令別居國分爲三大總羈縻昆莫騫旣致賜諭旨烏孫皆不願從乃發使遣騫報謝匈奴聞其與漢通怒欲擊之烏孫於是恐使使獻馬願得尙漢公主爲昆弟元封中遣江都王建女細君爲公主以妻焉公主至其國別治宮室而居歲時一再與昆莫會昆莫年老語言不通公主悲愁自作歌以述意歌曰吾家嫁我天一方遠託異國兮烏孫王穹廬爲室兮旃爲牆以肉爲食兮酪爲漿天子聞而憐之昆莫欲使其孫岑陁尙公主上書言狀天子報曰從其國俗欲與烏孫共擊胡岑陁遂妻公主公主死漢又

以楚王戍之孫鮮憂爲公主妻之岑陬死胡婦子泥靡尙小以國與大祿子翁歸靡曰泥靡大以國歸之翁歸靡號肥王復尙解憂公主公主生三男長元貴靡次萬年次大樂宣帝初匈奴連發大兵侵擊烏孫取車延惡師地收人民去使使謂烏孫趣持公主來欲隔絕漢昆彌上言欲發國中精兵自給人馬五萬擊匈奴漢使五將軍分道並出遣校尉常惠持節護烏孫兵昆彌從西入至匈奴右谷蠡王庭獲四萬級元康二年烏孫上言願以漢外孫元貴靡爲嗣會翁歸靡死國人共立岑陬子泥靡爲昆彌號狂王復尙解憂公主生一子鴟靡不與主和又暴惡失衆漢使衛司馬魏和意副候任昌送子侍公主公主言狂王爲烏孫所患苦易誅也遂謀置酒會罷使壯士拔劍擊之劍旁下狂王傷上馬馳去其子會兵圍和意昌及公主於赤谷城數月都護鄭吉發諸國兵救之乃解去烏就屠翁歸靡胡婦子狂王傷時驚與諸翁候俱去居北山中衆皆歸之後遂襲殺狂王自爲昆彌漢遣辛武賢將兵至敦煌遣使者案行表穿卑鞬候井以西

孟康曰井大道渠也下流湧出在白龍堆東土山下欲通渠轉穀積居廬倉以討之烏就屠恐願得小號詔令

詣長羅候赤谷城遂立元貴靡公主子初不得立者爲大昆彌烏就屠爲小昆靡皆賜印綬

烏就屠不盡歸諸翎候民衆復遣長羅候惠將三校屯赤谷因爲分別其民人地界然衆心皆附和小昆彌元貴靡鴟靡皆死公主上言年老土思願得歸骸骨葬漢地天子憫而迎之時甘露三年也元貴靡子星靡代爲大昆彌星靡死子雌栗靡代立小昆彌烏就屠子拊離立爲弟日貳殺之漢遣使者立拊離子安日爲昆彌日貳亡阻康居漢徙戊己校尉屯姑墨欲侯便討焉元壽二年伊秩摩同匈奴單于入朝自烏孫分立二昆彌後漢用憂勞且無寧歲魏興烏孫歲朝貢自車師後王轉西北於息孫本國無增損也晉代聲教弗及後魏太延初散騎侍郎董琬等出鄯善過九國北行至烏孫其王得朝庭所賜拜受甚悅使琬等往破洛那者舌烏孫王爲發導譯達二國其後每使朝貢蠕蠕數侵迫烏孫於是西徙葱嶺山中

匈奴

漢匈奴夏后氏之裔曰湍維殷時奔北方至周末七國時與燕趙秦爲隣趙王使李牧備匈奴始皇使蒙恬將數十萬衆北擊胡悉逐出塞收河南地渡河以陰山爲塞築四十四縣城臨河徙謫戍以充之自九原至雲陽因邊山險塹谿谷可繕者繕之起臨洮至遼東萬餘里匈奴世傳不可得考至冒頓宋祁曰冒音墨頓音毒又

突音而匈奴最强大盡服從北夷而南與諸夏爲敵國單于姓孛鞮氏謂賢曰屠

耆故常以太子爲屠耆王左王將居東方直上谷以東右王將居西方直上谷

以西延安藏寧郡之西而單于庭直代雲中匈奴父子同穹廬臥父死妻其後母兄弟

死盡妻其妻無寇帶之飾闕庭之禮逐水草遷徙無城郭耕田之業然亦各有

分地左右賢王左右谷蠡師古曰谷音廬廬炙反最大其貴族則有蘭氏須卜氏呼衍氏

師古曰今鮮卑有姓呼延者是歲正月諸長少會單于庭祠天五月大會龍城在朔方北祭其先天

地鬼神秋馬肥大會蹕林課校人畜單于朝出營拜日之始生夕拜月其坐尙

左而北向日上戊己高祖愚冒頓乃使劉敬奉宗室女翁主爲單于闕氏

師古曰翁

主諸王女言其父自主婚闕氏單于妻之號也音煙脂

約爲兄弟以和親文帝即位三年右賢王入居河南地

爲寇詔發車邊吏車騎八萬擊之右賢王走出塞帝幸太原歸罷擊胡之兵明

年單于上言今以小吏之敗約故罰右賢王使至西方夷滅月氏

師古曰明氏音支

蘭烏孫呼揭及其旁二十六國皆已與匈奴諸引弓之民并爲一家北州以定

願寢兵休士求和親養馬復故約以安邊民以應古始書至公鄉議和親甚便

漢許之會冒頓死子稽粥米號爲老上單于復遣宗人女爲翁主爲單于闕氏

孝文末軍臣單于立復絕和親漢使三將軍軍長安西細柳渭北棘門霸上以

備胡寇景帝復與和親時時小入寇邊故無大寇武帝即位匈奴自單于以下

皆親漢往來長城下馬邑軍後匈奴侵盜漁陽鴈門衛青出雲中以西至隴西

擊取胡之樓煩白羊王於河南於是漢遂取河南地築朔方復繕故秦時蒙恬

所爲塞因河以爲固時元朔三年也其後復侵朔方青將六將軍出朔方高闕

師古曰山名也一曰塞名在朔方之北

出塞七百里夜圍右賢王右賢王逃亡明年再出定襄擊之

而前將軍趙信失利降匈奴元狩二年春漢使霍去病將萬騎出隴西過馬支

山千餘里得休屠王祭天金人

孟陽曰匈奴祭天處本在雲陽甘泉山下秦擊取其地西夏從休屠右地故休屠有祭天金人像也師古曰即今佛像

復與合騎侯出隴西北地二千里過車延

漢帝紀武帝使伏波將軍路博德築遮虜障於居延城章懷太子曰居延匈奴中地名韋昭以

爲張掖縣失之居延縣者以所獲居延人而置此縣

攻祁連山

師古曰即天山匈奴稱天曰祈連

得胡虜三萬級裨小王以上十

餘人其秋單于怒昆邪王屠休王居西方爲漢所殺虜數萬人欲召誅之昆邪

休屠恐謀降漢漢使票騎將軍迎之昆邪殺休屠並將其衆降漢漢徙關東貧

民處所奪匈奴河南地新秦中以實之而滅地以西戍卒半元封中匈奴求和

親漢使楊信使於匈奴時西置酒泉郡以隔絕胡與羌通路又西通月氏大夏

以公主妻烏孫王以分匈奴西方之援又北益廣田至眩雷爲塞

服虔曰眩雷在烏孫北也眩音

郡都之縣

自是匈奴單于益西北左方兵入雲中右方兵直酒泉敦煌太初三年匈

奴使右賢王人酒泉張掖會任文擊救盡失其所得而去貳師破大宛還單于

欲追之不敢時且鞮侯單于初立恐漢襲之盡歸漢使之不降者路充國等於漢漢遣中郎將蘇武厚幣賂遺單于而單于益驕非漢所望也明年使貳師將二萬騎出酒泉擊右賢王於天山今哈密北山得首虜萬級而還使騎都尉李陵將步兵五千人出居延北千餘里與單于合戰陵所殺傷萬餘人兵食盡欲歸單于圍陵降匈奴其兵得脫歸漢者四百人單于乃貴陵妻以其女且鞮立五年死其子狐鹿姑單于立時太始元年也征利三年匈奴入五原酒泉殺兩部都尉漢遣貳師等出塞匈奴使大將與李陵三萬騎追漢軍至浚稽山今武合北轉戰九日至蒲奴水虜不利還去合重候軍至天山匈奴使偃渠與左右呼衍王要漢兵見漢兵強引去是時漢恐車師兵遮重合侯西遣闔陵侯將兵別圍車師盡得其王民衆而還二師將軍出塞匈奴使衛律要擊漢軍於夫羊句山狹二師遣屬國胡騎二千與戰虜兵壞散漢軍乘勝迫北至范夫人城應劭曰本城將亡其妻率餘衆完固之因以爲名或云范氏能胡詛者匈奴莫敢拒會二師妻子坐巫蠱收聞之憂懼欲深入

要功遂北度郅居水單于自將五萬要遮貳師貳師軍敗降單于素知其漢大將貴臣以女妻之尊寵在衛律上貳師在匈奴歲餘衛律害其寵會母闕氏病律飭胡巫言先單于怒曰胡故時祠兵常言得貳師以社今何故不用於是收貳師屠之會連雨雪數月畜產死人民疫病穀稼不熟單于恐爲貳師立祠室自貳師沒後武帝不復出兵昭帝始元初壺衍鞬單于立右賢王以谷蠡王以不得立怨望欲南歸漢恐不能自致即脇右賢王盧屠王欲與西接烏孫共擊單于盧屠王告之單于使人驗問右谷蠡不服反以其罪罪盧屠國人皆寃之於是二王去居其所未嘗肯會龍城師古曰各居其本處不復會龍城祭三年單于歸漢使不降者蘇武馬宏等以通善意時匈奴困于兵欲以漸致和親漢亦羈縻之又明年右谷蠡王死單于使犁汗王窺邊言酒泉張掖兵益弱出兵試擊冀可復得其地時漢先得降者聞其計天子詔邊警備無幾石賢王犁汗人日勒屋蘭番和師古地皆張掖縣番音盤張右太守屬國都尉發兵大破之匈奴寇邊少利又以兵擊烏孫取

車廷惡師地宣帝即位烏孫昆彌上書言連年爲匈奴所侵削願發國半精兵盡力擊匈奴惟天子出兵哀救公主本始二年漢遣祁連將軍田廣出西河度遼將軍范明友出張掖前將軍韓增出雲中後將軍趙充國爲蒲類將軍出酒泉雲中太守田順爲虎牙將軍出五原五將軍兵十餘萬騎出塞各二千餘里校尉常惠使護發兵西域烏孫昆彌亦自將五萬騎從西人匈奴聞漢兵已大出老弱奔走驅畜產遠遁蒲類將軍當與烏孫合擊蒲類澤烏孫先期至而去漢兵不與相擊及將軍出塞一千八百里捕虜得蒲陰王以下三百餘級虜皆引去其冬單于親擊烏孫頗得老弱欲還會天大雨雪深丈餘人畜凍死回者不能什一於是丁零乘弱攻其北烏桓入其東烏孫擊其西國大虛弱邊境省事矣壺衍鞬立十七年死其弟立爲虛閭權渠單于是歲地節二年也明年西域城郭諸國共擊匈奴取車師國得其王人衆而去單于復以車師王昆弟兜莫爲車師王收其人民東徙不敢居故地而漢益遣屯士分田車師以實之又明

年匈奴遣左右大將屯田右地欲以師侵迫烏孫西域後二歲遣左右奧鞬再擊漢之田車師城者不能下神爵二年單于死左大且渠謀立右賢王屠耆堂爲握衍胸鞬單于虛閭權渠子稽侯獬既不得立亡歸妻父烏禪幕烏禪幕者烏孫康居間小國數見侵暴率其衆降匈奴狐鹿姑單于以其弟子日逐王先賢掾姊妻之俾長其衆居右地日逐與握衍胸鞬有隙率數萬騎歸漢封日逐王爲歸德侯單于更立其從兄薄胥堂爲日逐王明年單于又殺先賢掾兩弟烏禪幕請之不廳心恚單于既立二年國中不附其明年烏桓擊匈奴東邊姑息王頗得人民單于怒姑息王恐即與烏禪幕及左地貴人共立稽侯獬爲呼韓邪單于發左地兵西擊至姑且水北握衍胸鞬兵敗走使人報其弟右賢王曰若不愛人殺昆弟若處毋來汗我單于恚自殺左大且渠亡之右賢王所是歲神爵四年也其後有曰屠耆曰呼揭曰車犁曰烏藉凡五單于並立既而車犁烏藉爲屠耆所擊敗烏藉呼揭皆去單于號其尊車犁單于屠耆擊車犁車犁

敗走其明年呼韓邪擊屠耆屠耆兵敗自殺子右谷蠡亡歸漢車犁東走呼
韓邪李陵子復立烏藉都尉爲單于呼韓邪捕斬之於是復都單于庭屠耆從
弟休循王殺左大且渠並其兵至右地自立爲閏振單于在西邊呼韓邪兄呼
屠吾斯亦自立爲郅支骨都侯單于在東邊後二年閏振東擊郅支與戰殺之
郅支遂進攻呼韓邪都單于庭呼韓邪敗走引衆南近塞遣子入侍郅支亦遣
子入侍時甘露元年也又二年呼韓邪朝天子於甘泉宮寵以殊禮郅支以呼
韓邪兵弱不能復自還即引其衆西欲攻定右地聞漢出兵穀助呼韓邪遂留
居右地因北擊揭西破堅昆北降丁零數遣兵擊烏孫勝之堅昆東去單于庭
七千里南去車師五千里郅支留都之元帝初郅支上書求侍子漢使谷吉送
之郅支怨漢擁護呼韓邪潛殺谷吉而居不知其後呼韓邪歸北庭人衆稍稍
歸之郅支自知負漢又恐呼韓邪襲擊會康居數爲烏孫所困欲倚匈奴取烏
孫乃遣兵迎郅支郅支遂結兵詣康居都護甘延壽與副陳湯橋師古曰橋與矯
同實不奉詔詐

以上命發兵 發戊己校尉屯田吏士及西域胡兵即康居斬之竟寧元年呼韓邪入朝自言願墾漢以自親元帝以後宮良家子王檣字昭君賜單于上書願保塞上谷以西至敦煌傳之無窮平帝時王莽秉政會西域車師王姑句音鈞 去胡來王唐兜皆怨恨都護校尉將妻子人民亡降匈奴師傳及莽之篡位也遺五威將王駿往曉以受命代漢狀因易單于故印釁由是生又明年車師後王降匈奴共殺戊己校尉刁護王莽怒於是大分匈奴爲十五單于初北邊自宣帝以來數世不見烽火之警及莽擾亂匈奴與之構難邊民死亡係獲又十部兵久屯而不出吏士罷弊數年之間北邊空虛野有暴骨矣更始初匈奴通使而單于驕倨自比冒頓數與虛芳共侵北邊吳漢等擊之經歲無功匈奴左部漸復轉居塞內比者呼韓邪之孫烏珠留若鞮之子也建初二十二年蒲奴比之從父弟立爲單于而比密遣漢人郭衡請河西太守求內附二十四年八部大人共立比爲呼韓邪單于以其大父嘗依漢得安故襲其號於是款五原塞

願永爲番蔽光武用恥國議分立南北兩單于

東觀記曰十二月癸丑匈奴治分爲中北單于

二十五年

遣左賢王莫將兵擊匈奴敗之匈奴震怖却地千里漢遣段彬等使南單于

立其庭

去五原西部塞八十里彬等反命復詔聽南單于入居雲中

冬北匈奴來擊逆戰不利于是復詔南單于

徙居西河美稷南卑于亦列置諸部王助爲扞戍北地朔方五原雲中代郡雁

門諸部皆領部衆爲郡縣偵羅耳目北單于惶恐頗還所掠漢人以示善意鈔

兵每到南部下還過亭候輒謝曰自擊亡虜奧韃日逐耳非敢逆漢人也後北

單于數遣使詣闕乞和親班彪曰今旣未獲助南則亦不宜絕北羈縻之意禮

無不荅詔彪立草告以前世呼韓邪郅支行事顯宗時北虜數寇鈔邊郡殺掠

甚衆帝患之永平十六年遣諸將四道出塞征北匈奴南單于亦遣右賢王信

從軍虜聞悉度漠去其冬入雲中遂至漁陽太守廉范擊却之建初八年北匈

奴三木樓訾大人稽留斯等率二萬人款塞元和二年車利涿兵等亡來入塞

凡七十三輩時北虜衰耗黨衆離畔南部攻其前丁零寇其後鮮卑擊其左西

域侵其右不復自立乃遠引而去章和二年鮮卑擊北匈奴大破之北庭大敗
斬優留單于取其匈奴皮而還章懷太子曰或云取其胸皮屈蘭等五十八部詣朔方北地降
永元中南單于求滅北庭以耿秉竇憲出朔方擊北匈奴單于遁走三年復爲
右校尉耿夔所破逃亡其弟右谷蠡王於除鞬自立將右溫禺鞬王骨侯已下
衆數千人止蒲類海遣使欵塞竇憲請立於除鞬爲北單于袁安等以爲不可
朝廷不從帝遣耿夔即授璽綬賜劍具羽蓋使中郎將任尙持節衛護屯伊吾
如南單於故事方欲輔歸北庭會竇憲誅五年於除鞬自叛還遣將兵長史王
輔以千騎與任尙共追誘將還斬之破滅其衆元興元年北匈奴重遣使詣敦
煌貢獻辭以國貧未能備禮願請大使當遣子入侍時鄧太后臨朝亦不答其
使但加賜而已

鮮單

漢鮮單東胡之支別依鮮單山因號焉初亦爲冒頓所破遠竄遼東塞外與烏

桓相接建武二十二年鮮單與匈奴入遼東遼東太守祭彤擊破之斬獲殆盡
二十五年鮮單始通驛使其後都護偏何等詣祭彤求自効功因令斬北匈奴
三十年鮮單人於仇貴率種人來朝帝封於仇貢爲王永元中竇憲遣右校尉
耿夔擊匈奴北單于遁走鮮單因此轉徙據其他匈奴留者尙有十餘萬皆自
號鮮單鮮單由此漸盛元初中鮮單一百二十部分處遼東遼西時匈奴南單
于子逢侯率衆出塞漢兵不能追四年逢侯爲鮮單所破部衆皆歸之永寧九
年遼西鮮單大人烏倫其至鞬率衆詣鄧遵降詔封烏倫爲率衆王延光初其
至鞬分數道攻南匈奴於曼柏縣名屬五原郡奧鞬日逐王戰死三年復寇高柳破南
匈奴殺漸離王桓帝時檀石槐立乃建庭於彈汗山讞仇水去高柳北三百餘
里東西部大人皆歸焉因南抄緣邊北掠丁零東劫扶餘西擊烏孫盡據匈奴
故地時分地爲三部東接扶餘二十餘邑爲東部從右北平以西至上谷十餘
邑爲中部上谷以西至敦煌接烏孫二十餘邑爲西部各置大人主之檀石槐

死子和連立和連死子騫曼年小兄子魁頭立後騫曼與魁頭爭國部衆遂離散魁頭死其弟步度根立魏文帝初步度根遣吏獻馬拜爲王數與軻比能相攻擊部衆稍弱將其衆萬餘落保太原鴈門郡黃初後一心守邊不爲寇軻比能本小部鮮卑初封爲附義王衆益強控弦數十萬然未能及檀石槐也明帝即位務欲綏和戎狄羈縻两部青龍三年并州刺史王雄遣勇士刺殺比能更立其弟素利彌加厥機皆爲大人建安中貢獻通市皆表寵以爲王其後更相攻擊國亂離散如伏乞氏隴西鮮卑也秃髮氏河西鮮卑也慕容氏拓跋氏宇文氏皆別部鮮卑也

高車

高車初號爲狄歷北方以爲刺勒諸夏以爲高車丁零焉或云其先匈奴人也種有狄氏袁紇氏斛律氏解批氏異氏奇斤氏俗謂單于女爲狼妻而產子後遂滋繁故其人好引聲長歌有似狼嗥本無統率種各有君長黨類同心至於

寇難翕然相依婚姻用牛馬納聘俗無穀不作酒迎娶之日男女相將持馬酪熟肉即主人延賓亦無行位穹廬前叢坐飲宴終日其死亡葬送掘地作坎坐尸於中無異于生露坎不掩走馬遶旋多者數百市男女無大小皆集會之其遷徙隨水草衣皮食肉牛羊畜產盡與蠕蠕同惟車輪高大輻數至多後徙于陸渾海北一百餘里部落强大常與蠕蠕爲敵亦每侵盜於魏魏道武度弱洛水西行至陸渾海襲破之復討其餘種於狼山又自骹髮水西北徇略其部破其襍種三十餘部時蠕蠕社崙破敗轉徙廣漠之北侵入高車地掩殺其衆走脫者什之二三將軍伊謂北襲高車餘種袁紇烏頻破之太祖分散諸部惟高車以類粗獷不任使役故得別爲部落其後太祖征蠕蠕還至漠南聞高車東部在已尼陂相去千餘里遣騎襲破之降數十萬皆徙置漠南千里之地高宗時五部高車合聚祭天衆至數萬高車之族有十二姓先是副伏羅部爲蠕蠕所役屬社崙國部分散副伏羅氏阿伏至羅與從弟窮奇分部而立窮奇爲嚙

嗟所殺阿伏至羅失衆心共殺之窮奇子彌俄突立遣使朝貢宣武詔扎曰嘸
嗟蠕蠕與吐谷渾所以交通者皆路由高昌特角相接今高昌內附遣迎引蠕
蠕既與吐谷渾往來路絕姦勢亦阻使今行途經由宜相供俟不得妄令羣小
擁塞彌俄突尋與蠕蠕主伏圖戰於蒲類海北今巴爾庫勒淖爾在鎮西府治西北爲伏圖所敗西
走三百餘里伏圖次子伊吾山北鎮西府南境初高昌請內徙世宗遣宗威迎之至
於伊吾伏圖見威軍怖而遁走彌俄突聞其駭散追擊大破之殺伏圖於蒲類
北海肅宗初彌俄突與蠕蠕主醜奴戰敗擒之擊其兩脚於馬上頓曳殺之漆
其頭爲飲器其部衆悉入嘸嗟數年彌俄突弟伊匐還國詔拜鎮西將軍高車
王復大破蠕蠕蠕蠕主婆羅門走投涼州其弟越居殺伊匐自立靜帝時伊匐
子比適又殺越居越居子去賓自蠕蠕來奔封爲高車王肆州刺史死於鄴至
隋有突越失國即後魏之高車矣

蠕蠕

新疆大記 城郭記下

蠕蠕姓郁久閭托跋主力微掠騎得一奴髮始齊眉忘本姓名其主字之曰本骨閭言首秃也音訛爲都久閭其子孫因以爲氏木骨閭旣長免奴爲騎卒後亡匿廣漠間收合逋逃得百餘人依純突隣部其子車鹿會始有部衆自號柔然後魏太祖以其無知狀類如蟲故改其號曰蠕蠕傳至社崙兇狡有權略度漠北侵高車深入其地遂并諸部北徙弱洛水始立軍法其西北有匈奴餘種國尤富强部帥舉兵擊社崙社崙逆戰於額根河立破之盡爲社崙所并號爲强盛其西則焉耆之北東則鮮卑故地之西北則渡沙漠窮瀚海南則臨大磧其常所會庭則敦煌張掖之北於是自號可汗永興中犯塞太宗討之社崙遁走道死後蠕蠕頻擾北邊神廡二年太武率兵十餘萬襲之其主大檀震怖絕迹西走於是國落四散竄伏山谷畜產野布太武緣粟水西行過漠將寶憲故壘六月次於免園水去平域三千七百餘里分軍搜討東至瀚海西至張掖水北渡燕然山而高車都部又殺大檀種類八月親征已尼陂前後歸降三十餘萬先

是北鄙侯吳提者世祖遇之甚厚咸和中尙西海公主大延二年絕和犯塞車駕幸五原親征三道並出車駕出中道至浚稽山分中道復爲二道陳留王崇從大澤向涿邪山車駕至浚稽北向天山西登白阜刻石紀行不見蠕蠕而還眞君四年親征吳提至鹿渾谷與賊遇吳提遁追至額根河擊破之至石水而還吳提死子吐賀眞立又征破之自是邊疆息警吐賀眞子予成子豆侖太和二年立其部內高車阿伏至羅率衆十餘萬自立豆侖與叔父那蓋分二道擊之豆侖出自浚稽山北而西那蓋出自金山豆侖頻爲阿羅所敗那蓋累有勝捷國人以天助欲推那蓋爲主那蓋不從國人殺豆侖母子以示乃襲位那蓋死子伏圖立永平元年伏圖西征高車爲彌俄突所殺子醜奴善用兵大破高車擒其主彌俄突殺之盡誅叛者國遂強盛後高又侵醜奴醜奴軍敗爲母與其大臣所殺而立其弟阿那環立纔十日其族兄俟力發率衆伐之阿那環輕騎南走歸魏封朔方郡公蠕蠕王阿那環來奔從父兄婆羅門率衆討

俟力發破之衆推婆羅門爲主會婆羅門爲高車所逐率部落詣涼州降於是蠕蠕數萬相率迎阿那環尙書李崇泰曰臣等參議以爲懷朔鎮北土名無結山吐若奚泉敦皇北西海郡即漢晉舊障二處寬平原野彌沃阿那環宜置吐若奚泉婆羅門宜置西海郡冬令總率部落收離聚散時朝廷問安置之宜于涼州刺史袁翻翻表曰蠕蠕高車迭相吞噬始則蠕蠕衰微高車強盛及蠕蠕復振反破高車主散人離不絕如縊而令高車能終雪其恥復推蠕蠕者正由種類繁多不可頓滅故也今蠕蠕內爲高車所討滅外慰大國之威靈兩主投身一周而至蠕蠕存則高車有內顧之憂未暇窺裔上國蠕蠕全滅則高車跋扈之計豈易可知愚謂蠕蠕二主宜並存之居阿那環于東偏處婆羅門于西裔其婆羅門請脩西海故城以安處西海故城本屬涼郡在酒泉直北張掖西北千二百里高車所住金山千餘里正是北虜往來之衝要漢家行軍之要道土地沃衍野大軍耕殖非但今處婆羅門於事爲便即可永爲重戍鎮防西

北宜遣一良將監護且西海北垂即是大磧野獸所聚千百爲羣正是蠕蠕射獵之處殖田以自供藉獸以自給彼此相資足以自固時朝議是之詔安西將軍廷尉卿元洪超詣敦煌安置婆羅門尋與部衆謀叛投嚙噠仍爲州軍所討擒之五年婆羅門死於洛南之館惟阿那瓌部落旣和士馬稍盛乃號可汗長子尙魏公主出帝又納阿那瓌女爲后又以其孫女妻齊獻武王子長廣公湛阿那瓌初復其國盡禮朝廷後頗強盛遂不復稱臣及齊受東魏禪後阿那瓌爲突厥所破自殺子庵羅辱奔齊文宣帝乃北討突厥而立之置之馬邑川後背叛文宣親征破之國人立鄧叔子爲主又爲突厥所破以西魏恭帝二年率部落千餘家奔關中突厥旣恃兵強又藉西魏和好因請盡殺蠕蠕周文帝遂收縛蠕蠕主以下三千餘人付突厥使于青門外斬之中男以下免死配王公家爲奴隸

悅般

新疆大記 城郭記上

悅般其先匈奴北單于之部落爲漢寶憲所逐北單于度金微山西走康居其羸弱不能去者往龜茲北地方數千里衆可二十餘萬人涼州人猶謂之單于王其風俗語言與高車同而其人情潔於胡俗翦髮齊眉以餽餽塗之昱昱然光澤日三澡漱然後飲食其國南界有大山山傍石皆焦鎔流地數千里乃堅凝人取以爲藥卽石流黃也與蠕蠕結好其王嘗入蠕蠕國欲與大檀相見入其界百餘里見其部人不浣衣不洗手不絆髮婦人口舐器物王謂其從者曰汝曹誑我我將入狗國中乃馳還大檀遣騎追之不及自是相讐仇數相征討後魏眞君四年使遣朝獻供貢幻人言其國有大術者蠕蠕來抄掠術人能作霖雨盲風大雪及行潦蠕蠕漂亡者什二三是歲求與官軍東西齊契討蠕蠕太祖嘉其意命諸軍戒嚴以淮南王他爲前鋒襲蠕蠕還有司以其鼓舞之節施之於樂府自是每使朝貢

鐵勒之走匈奴之苗裔也自西海之東依據山谷往往不絕獨洛亦作邏河北有

僕骨同羅韋訖投野古覆羅並號俟斤蒙陳吐如訖斯結渾斛薛等姓勝兵可

二萬伊吾以西焉耆之北傍白山則有契弊亦作苾薄落職乙啞蘇婆那曷烏□

訖骨也啞於尼謹等姓勝兵二萬金山西南有薛延陀啞勒兒十盤達契等萬

餘兵康國北傍阿得水則有訶啞曷截撥忽咄干具海曷比悉等三萬兵得嶷

海東西有蘇路羯等姓八千餘拂菻東則有恩屈阿蘭等近二萬人北海南則

都波等雖姓氏各別總謂爲鐵勒並無君長分屬東西突厥隨水草流移近西

邊者頗爲藝植多牛羊而少馬自突厥有國東西征討皆資其用以制北荒本

謂勅勒十六國慕容垂塞北後魏末河西並云有勅勒也鐵勒蓋言訛也隋開皇末晉王北征大破步迦可

汗鐵勒於是分散大業元年突厥處羅可汗擊鐵勒諸郡部厚斂其物又猜忌

薛延陀等爲變遂集其魁帥數百人盡誅之由是一時反叛拒處羅遂立俟斤

契弊歌楞爲易勿真莫何可汗居貪汚同山復立薛延陀內俟斤

字也啞爲小可汗處羅敗莫何始大伊吾高昌焉耆悉附之俗與突厥同惟丈夫婚畢就便妻家待產乳男女然後歸舍死者埋殯之此其異也大業三年貢方物自是不絕

薛延陀

薛延陀

隋書作陶

鐵勒之別部

通考前燕慕容雋時匈奴單于賀賴頭率部三萬五千來陀蓋其後

與薛雜居後滅延陀部

有之號薛延陀姓壹利吐氏在鐵勒諸部最雄隋大業初共奉乙失鉢爲小可汗保燕末山而突厥射匱復彊延陀黜可汗號往臣之回紇拔野古阿跌同羅僕骨白霽在鬱督軍山者東屬始畢乙失鉢在金山者西役葉護可汗貞觀中葉護死其國亂乙失鉢孫夷男率部帳附頡利突厥衰夷男反攻頡利弱之太宗册拜夷男爲眞珠毗伽可汗樹牙鬱督軍山直京師西北六千里東鞞鞞西葉護突厥南沙磧北俱倫水地大衆附於是回紇諸部莫不伏屬頡和旣滅塞隧空荒毗伽率其部稍東保都尉犍山獨邏水之陰遠京師纔三千里而

羸東室韋西金山南突厥北瀚海蓋古匈奴地也以二子六度談突利失分將之爲南北部十五年帝以李思摩爲可汗始度河牙於漠南延陀惡之帝幸洛陽延陀勒兵二十萬南絕漠壁白道川擊思摩思摩走朔方旣而延陀使求與突厥平帝曰我約漠以北延陀制之漠以南突厥專之與突厥和乃故約也尙何請不報夷男死子拔灼立爲可汗性卞克多殺舊時貴臣而任所親昵國入不安後諸部潰亂可汗去依那史那時健俄爲回紇所殺盡屠其宗衆奔西城立眞珠毗伽可汗昆弟子咄摩支爲可汗上言願保鬱督軍山詔崔敦禮與李勣慰安之勣至咄摩支陰欲拒戰勣縱兵擊斬五千餘級遂滅其國時蕭嗣業在回紇咄摩支詣嗣業降遂入朝帝以延陀滅欲并契苾等降之遣江夏王道宗阿史那社爾窮討帝幸靈州節度諸將於是鐵勒十一部皆歸命天子請吏內屬帝割其地爲州縣北荒遂平後三年餘部叛以右領軍執失思力討平之至永徽時延陀部亡散者悉還高宗置嶧彈州安處之

同羅

同羅亦鐵勒部在薛延陀北多覽葛之東距京師七千里初臣突厥太宗時遣使內附以其地置龜林都督府泊天寶初其酋帥阿布思以衆來降處之朔方河南之地至十年背叛擊掠諸部落還漠北遂爲回紇所破阿布思奔葛邏祿北庭節度程千里購之以獻安祿山反劫其兵用號曳落河曳落河者猶健兒云

僕骨

僕骨亦曰僕固在多覽葛之東帳戶三萬地最北俗梗頑難召率與同羅夙敦隣好突厥政亂附薛延陀及延陀之敗也其大酋婆匐詣闕內附以其地爲金微州拜歌濫拔延爲都督開元初爲首領所殺詣朔方降有司誅之子曰懷恩至德初以功至朔方節度使僕固懷恩傳懷恩世襲都督安祿山反從郭子儀討賊雲中破之肅宗赴靈武時同羅部落叛祿山北掠朔方子俄率懷恩迎擊懷恩子玢戰敗降虜已而自拔歸懷恩怒叱斬之將士股栗皆死戰遂破其衆擊史朝義平河北以功授節度廣德初進太保後懷恩反誘吐蕃入塞帝下詔親征懷恩至鳴沙病死始懷恩立功門內死

王事者四十六人及拒命士不弛甲凡三年帝隱忍數下詔未嘗聲其反及死爲之惻然曰懷恩不反爲左右所誤耳俄而從子名臣以千騎降

多覽葛

多覽亦作濫葛在薛延陀西境東濱同羅水延陀滅其酋俟斤多覽葛未與回紇來朝以其地爲燕然都督府授其酋世爲都督

斛薛

斛薛在多覽葛北境兩姓合居旣來朝列其地爲州縣

阿跋

阿跋在多覽葛西北隋代號訶啞部遷徙無常所唐初來朝以有地爲雞田州其後即李光顏光進光顏光進唐書皆有傳皆以戰功賜姓李氏

契苾

契苾亦曰契苾羽在焉耆西北鷹娑川多覽葛之南其酋哥楞自稱可汗弟莫賀咄勒皆有勇莫賀咄死子何力紐率其部來歸時貞觀六年也詔處之甘涼

間以其地爲榆溪州永徽四年以其部爲賀蘭都督府隸燕然都督府何力大有戰功忠節士也大和中其種帳附于振武云

拔野古

拔野古或爲拔曳固漫散磧北地千里直僕骨東境貞觀二十一年來降其地東北有川曰康干河投松木入水三年化爲石色蒼緻然節理猶在世謂之康干石初與僕骨奚霫同入朝內屬置幽陵都督府顯慶時復叛鄭仁泰討之斬其渠帥天寶間來朝

白霫

白霫居鮮卑故地與同羅僕骨接避薛延陀保奧支水冷陁山南契丹北烏羅渾東靺鞨西拔野古地圓袤二千里山繚其外其部有曰居延曰無若沒曰潢水其君長臣突厥頡利爲俟斤貞觀中列其地爲賓顏州以別部爲居延州即用俟斤爲刺史顯慶時授其酋長李含珠爲居延都督後無聞焉

北突厥

唐車鼻亦阿史那族東突厥頡利部人也名斛勃代爲小可汗牙在金山今阿勒坦

鄂拉在鎮西府北之北頡利之敗北荒諸部欲共君長之會薛延陀爲可汗遂率所部

歸焉其爲人有智數衆頗便附延陀惡而將誅之車鼻知其謀竄歸舊所金山之北陡絕一隅惟一面可容車騎壤土夷博即據之自稱乙注車鼻可汗西葛邏祿北結骨皆統隸之延陀衰車鼻執張貞觀四十一年遣子沙鉢羅獻方物且請入朝帝遣韓華安調遮往迎之至則車鼻偃然無入朝意華謀與葛邏祿共劫之車鼻覺華與其子陟苾特勒鬪死調遮被殺帝怒遣右驍衛郎將高侃潛引回紇僕骨兵擊之其大酋葛邏祿泥孰闕俟利發處木昆莫賀咄俟斤等相繼來降永徽元年侃師次阿息山車鼻見部落皆不肯戰遂携妻子從百騎遁追至金山護之送京師高宗赦之賜宅長安處其餘衆於鬱督軍山置狼山都督府以統之車鼻子羯曼陀先統拔悉密部諫車鼻請

歸國不聽乃遣子鑠菴入朝至是來降詔拜爲左屯衛將軍建新黎州使領其衆於是突厥盡爲封疆之臣始分置單于瀚海二都護府二十二州各以其首領爲都督刺史單于領狼山雲中桑乾三都督蘇農等十四州瀚海領金微新黎等七都督仙萼賀蘭等八州麟德初改燕然爲瀚海都督府徙故瀚海都督府于古雲中城號雲中都護府磧以北蕃州悉隸瀚海南隸雲中雲中者隋義成公主所居也頡利滅李靖徙突厥羸破數百帳居之以阿史德爲之長稍盛即建言願以諸王爲可汗遙統之帝曰今可汗古單于也乃改雲中府爲單于大都護府調露元年單于府首領阿史德溫傅奉職二部落相率叛立那史那泥孰匐爲可汗二十四州皆叛應之裴行儉李思文等統衆戰黑山大破之泥孰匐爲下所殺并擒奉職而還餘衆保狼山永徽二年溫傅部又迎頡利兄子伏念於夏州度河立爲可汗諸部響應又令行儉率師討之伏念北走保黑沙行儉縱單于府兵躡之伏念惶駭不得戰遂間道詣行儉降伏念敗頡利部人骨咄祿吐屯鳩集亡散保總材山又治黑山城有

衆五千抄盜九姓漸至強盛乃自立爲可汗以其弟默啜爲殺咄悉匐爲葉護阿史那元珍者習中國風俗知邊塞虛實常坐事爲單于長史王本立所拘執因便投骨咄祿遂以爲阿波大達干專統兵馬事骨咄祿天授中卒子尙幼默啜遂篡其位默啜攻討契丹契丹部衆大潰盡俘其家口自此兵衆漸盛武后册拜頡利利施大單于默啜殘破州郡負勝輕中國有驕志大抵兵與頡利時略等諸蕃悉與聽命初咸亨中突厥諸部來降附者多處之朔代豐勝靈夏六州謂之河曲降戶默啜至是索此降戶及單于都護府之地姚璿請許其和親默啜寢強由此也武后朝連歲寇邊殺掠不計中宗始即位入攻鳴沙靈武軍總管沙叱忠義與戰不勝詔左屯衛大將軍張仁愿本名仁亶爲朔方道大總管屯邊朔方軍今定邊縣北與突厥以河爲界河北岸拂雲堆有祠突厥將入寇必先詣祠祭酬求福因牧馬料兵候合冰渡河景雲初默啜西擊娑葛仁愿乘虛奪取漠南之地築三受降城絕其南寇之路盡力六旬而三城成以拂雲祠爲中城

南直朔方西城南直靈武東城南直榆林相去各四百餘里據津濟其北皆磧也拓地三百里而遠又於牛頭朝那山北置烽堠一百八十所自是突厥不敢度山放牧朔方減鎮兵數萬人開元二年默啜使子移涅及同俄特勒等率騎圍北庭都護郭虔瓘兵擒同俄特勒于城下斬之衆奔解默啜年老昏暴部落怨叛離散於是十姓左五咄陸左五弩矢畢及俟斤等相繼降葛邏祿胡屋鼠泥施三姓大漠陰山謀落匍雞元池都督踏實力胡鼻等相率內附詔處其衆於金山其高麗趺跌吐谷渾郁射施大酋等合萬餘帳相踵欸邊令居河南之舊地其秋默啜與回紇九姓酋無陷思布戰於磧北九姓大潰思結等部來降帝悉官之詔金山大漠陰山元池都督共圖取默啜四年默啜又北討九姓拔野古戰於獨樂河一作洛河拔野古大敗默啜負勝輕歸不設備道大林中拔野古歿衆突出擊默啜斬之骨咄祿子闕特勒鳩合故部攻殺默啜子及諸親信畧盡立其兄默棘連爲毗伽可汗闕特勒爲左賢王專掌兵馬噉欲谷者亦默

噉用事之臣以女爲默棘連可敦得免廢後突騎施蘇祿自爲可汗突厥部種多貳默棘連乃召噉欲谷爲謀主八年朔方大總管王峻等悉發蕃漢士集稽洛水上迺西徵拔悉密東發奚契丹期以秋初引朔方兵入掩厥突牙帳默棘連大恐後拔悉果臨突厥帳知王峻兵及兩蕃不至拔悉密懼而引退突厥欲擊之噉欲谷曰此衆去家千里必將死戰不如躡之邀近而取之時拔悉在北庭距北庭二百里噉欲谷分兵由他道襲拔其地即擊拔悉密衆走趨北庭無所歸盡擒之噉欲谷回兵出赤亭今敦煌縣西境掠涼州官軍勒兵討捕爲所敗默棘連由是益振盡有默噉餘衆比年遣使入朝吐蕃以書約同寇邊默棘連不敢從封上其書帝嘉之詔朔方西受降城許互市默棘連死國人立其子爲伊然可汗立八年卒其弟苾伽骨咄祿可汗立爲其左殺判闕特勒所殺遂立苾伽可汗子又爲骨咄葉護所殺立其弟又殺之葉護乃自爲可汗天寶初回紇葛邏祿拔悉密並起攻葉護殺之尊拔悉密之長爲頡跌伊施可汗於是回紇葛

邏祿自爲左右葉護國人奉判闕特勒子爲烏蘇米施可汗以其子葛臘哆爲西殺帝使諭令內附不聽其下又與拔悉密等三部共攻烏蘇米施米施遁亡其西葉護阿布思及葛臘哆率五千帳來降又三年烏蘇米施爲拔悉密所殺其弟白眉特勒鶻隴匐立是爲白眉可汗朔方節度使王忠嗣以兵乘其亂抵薩河內山擊其左阿波達干十一部破之獨其右未下而回紇葛邏祿殺拔悉密可汗奉回紇骨力裴羅定其國明年殺白眉可汗始定突厥國於後魏大統時至是滅後或朝貢皆舊部九姓云其地盡入回紇始其族分國於西者曰突厥

拔悉密

唐拔悉密一名幣刺國在北庭北海南結骨東南依山散尼去敦煌三千餘里戶二千餘其人雄健皆獵國多雪恆以木爲馬雪上逐鹿其狀似楯而頭高其下以馬皮順毛衣令毛著雨雪而滑如著屨屐縛之足下若下阪走過奔鹿若

平地履雪即以杖刺地而走如船馬上阪即手持之而登其所居以樺皮爲舍
丈夫翦髮以樺皮爲帽貞觀二十二年來朝天寶初與回紇殺突厥可汗立其
大酋阿史那施爲賀臘毘伽可汗遣使者入謝不三年爲葛邏祿回所殺奔北
庭後朝京師拜武衛將軍地與衆歸回

葛邏祿

唐葛邏祿葛一作祿本突厥族在北庭西北金山之西跨僕固振水今烘和圖淖爾包多怛

嶺與車鼻部接西突厥有三族一曰謀落或爲謀刺二曰熾俟或爲姿匐三曰踏

實力永徽初高侃伐車鼻可汗三姓皆內屬顯慶二年以謀落爲陰山都督府

熾俟爲大漠都督府踏實力爲元池都督府用其酋長爲都督初以其部南統于賀魯叛以三姓爲都

魯府又分熾俟部置金附州三族當東西突厥間視其興衰叛服不常也後稍

南徙自號三姓葉護庭州以西諸突厥皆畏之天寶間與回紇拔悉密攻殺烏

蘇米施可汗又三年擊悉密走其可汗於北庭奔京師葛邏祿與九姓復立回

紇裴羅定其國於是處烏德鞬山者臣回紇在金山北庭者自立葉護久之葉護頓毗縛突厥叛酋阿布思進封金山郡王至德後葛邏祿寢盛與回紇爭強徒十姓可汗故地盡有碎葉恆邏斯諸域然梗回紇朝貢不能自達

回紇

回紇其先匈奴也俗多乘高輪車元魏時號高車部又曰勅勒後訛爲鐵勒其部落曰袁紇薛延陀契苾羽都播骨利幹多覽葛僕骨拔野古同羅渾思結斛薛奚結阿跌一作跋白霽凡十有五種皆散處磧北袁紇者亦曰烏護曰烏訖隋曰韋紇初無酋長臣於突厥大業中突厥處羅攻鐵勒集其柒豪數百悉斬之韋紇乃併僕骨同羅拔野古叛去自爲俟渠之切斤稱回紇姓藥羅葛氏居薛延陀北娑陵水上距京師七千里衆十萬勝兵半之有時健俟斤者衆始推爲主其子菩薩材勇有謀下皆畏服時健死部人賢菩薩立之回紇寢盛與薛延陀共攻突厥北邊頡利遣欲谷設領騎討之菩薩破之馬鬣山追北至天山大俘

其部人聲震北方由是附薛延陀相脣齒樹牙獨樂水上

唐回鶻道烏德鞬山左右有嗚昆河獨羅河案羅或

今樂又作樂洛作烏里雅蘇圖

貞觀三年遣使獻方物突厥已亡惟回紇與薛延陀最强盛雄強

菩薩死其酋胡祿俟利發吐迷度與諸部共攻薛延陀歿之併有其地遂南踰賀蘭山境諸河遣使者獻款太宗爲幸靈州次涇陽受其功於是鐵勒十一部皆來言各有分地願歸命天子請置唐官時官之凡數千人明年乃以回分部置州以回紇爲瀚海以多覽葛爲燕然以僕骨爲金微以拔野古爲幽陵以同羅爲龜林以思結爲盧山皆號都督府以渾爲臯蘭州斛薛爲高闕州阿跌爲雞田州契苾羽爲榆溪州奚結爲雞鹿州思結爲蹕林州白霽爲寘顏州其西北結骨爲堅昆府骨利幹爲元闕州東北俱羅勃爲燭龍州皆以酋領爲都督刺史長史司馬即故單于臺置燕然都護府統之其六都督七州皆隸屬焉以李索立爲燕然都護詔磧南鷓鴣泉之陽置故郵六十八所具羣馬湏肉以待使客乃拜吐迷度懷化大將軍兼瀚海都督然私自號可汗阿史那賀魯之

叛其子婆閏助契苾何力等擊破之收北庭又從伊麗道行軍總管任雅相再破賀魯金牙山婆閏死子比栗嗣龍朔中以燕然都督府領回紇更號瀚海都護府以磧爲限大抵北蕃皆隸之武后時北突厥默啜方強取鐵勒故地故回紇與契苾思結渾三部度磧南徙甘涼間唐嘗取其壯騎佐赤水軍比栗死子獨解支嗣獨解支死子伏帝匐嗣助唐攻殺默啜於是別部移健頡利發與同羅白霽等來詔置其部於大武軍北伏帝匐死子承宗涼州都督王君奭誣暴承宗罪流死灤州時回紇稍不循法族子瀚海司馬護輸乘衆怨共殺君奭梗絕安西諸國貢道久之奔回紇故地承宗子骨力裴羅天寶初會突厥亂裴羅與葛邏自稱左右葉護助拔悉密擊走馬蘇襲可汗未幾襲破拔悉密遂自稱骨咄祿毗伽闕可汗天子以爲奉義王南居突厥地徒牙烏德鞬山昆河今鎮西府之間南距西城西城受千七百里西城漢高闕塞也北盡磧口三百里巴爾庫勒悉有九姓地九姓曰藥羅葛曰胡咄葛曰崛羅勿曰貊歌息訖曰阿勿嚙曰葛薩曰斛嗚素曰藥勿葛曰奚邪勿藥羅葛皆回紇姓也與僕骨渾拔野

古同羅思結契苾六種相等夷不列於數後破有拔悉密葛邏祿總十一姓並置都督號十一都落自是戰常以二客部爲先鋒有詔拜裴羅爲懷仁可汗明年攻殺突厥白眉可汗斥地愈廣東極室韋西金山南控大漠盡得匈奴故地裴羅死子磨延啜立肅宗即位可汗自將與郭子儀合討同羅蕃破之河上與子儀會呼延谷又令太子葉護從王進討賊香積之戰詭伏騎于王師左將襲我僕固懷恩有傳麾回馳之盡翦其伏乃出賊背與鎮西北庭節度李嗣業夾彘尺氏切之賊大敗進攻長安及嚴莊挾安慶緒棄東京北度河回紇大掠東都三日廣平王欲止不可而耆老以繒錦萬疋賂回紇乃止葉護還京師帝錫宴甚厚乾元元年回紇使者多彥阿波與黑衣大食酋閣之等俱朝爭長有司使異門並進又使請昏許之帝以寧國公主下嫁可汗使王子骨啜特勒等率騎三千助討賊詔命僕固懷恩總之又遣使謝婚并告破堅昆功俄而可汗死葉護太子前得罪死故次子移地健立號牟羽可汗其妻懷恩女也寶應初以史

朝義未滅，敕雍王爲元帥，會陝州懷恩與回紇可汗及諸將擊賊，戰橫水，進收東都。可汗遣使賀天子獻朝義旗物。雍王還靈寶，可汗屯河陽，留三月，屯旁人困於剽辱，僕固瑒懷恩子率回紇兵朝義，戰蹀血二千里，梟其首河北。悉平，初回紇至東京，放兵剽掠，至是益橫，民困虐於賊，已永泰中，懷恩反，誘回紇吐蕃入寇，未幾懷恩死，二酋爭長，回紇首領潛擬涇陽，見郭子儀請改事之，子儀易服詣其營，其酋長相顧曰：「真是公矣。」子儀遂遺以纏頭綵三千，且讓之，酋長讐服曰：「懷恩詭我，我等願還擊吐蕃，以報厚恩。」子儀持酒與胡祿都督盟，回紇與唐兵擊退吐蕃，俘獲甚衆。僕固名臣懷恩兄子降，銳將也合胡祿都督等二百入，皆來朝。賜予不可紀。大歷十三年，回紇襲振武，攻東涇，入寇太原，代州都督張光晟破之，虜乃去。德宗初立，使中人告喪，且修好時，九姓胡勸可汗入寇，可汗欲悉師向塞，見使者不爲禮，宰相頓莫賀達干言之不聽，因擊殺可汗，并屠其支黨及九姓，幾二千人，即自立爲合骨咄祿毗伽可汗，使使入朝，始回紇至中國，常參

以九姓胡留京師至千人居貲殖產甚厚會酋長突董等歸國裝橐係道留振武三月光晟爲軍使陰伺之皆盛女子以橐光晟使驛吏刺以長錐然後知之已而聞頓莫賀立多殺九姓胡人懼不敢歸往往亡去突董察視嚴亟群胡獻計於光晟請悉斬突董諸人光晟許之即上言其狀乃勒兵盡殺回紇羣胡帝召光晟還以彭令方代之遣中人與回紇使往言其端後三年可汗求和親帝以李泌言乃許之詔咸安公主下嫁明年可汗上書甚恭請易回紇爲回鶻

西突厥

西突厥者居烏孫故地西魏末東突厥木杆可汗舍其子大邏便而立弟他鉢爲可汗他鉢立以攝圖爲儻伏可汗小可汗也木杆兄乙息記可汗之子統東面以爲步離可汗但耨可汗子居西方他鉢死先戒其子菴羅必立大邏便國人以其母賤不得立而菴羅讓攝圖立之號沙鉢略可汗治都斤山以菴羅居獨洛水稱第二可汗大

羅便乃謂沙鉢略曰我與爾俱可汗子今爾獨尊我無位何也沙鉢略以爲阿波可汗自鎮所部未幾沙鉢略襲擊之殺其母阿波西奔達頭漸以強盛自立龜茲鐵勒咸附之于是突厥分爲東西二國達頭者名玷厥沙鉢略之從父也舊爲西面小可汗卽而亦怒沙鉢略授阿波兵十萬使攻東突厥而阿波竟爲沙鉢略所擒國人共立鞅素特勒之子爲泥利可汗

魏書突厥土門始稱可汗其別部典兵者曰設子弟謂之特勒其大

官曰葉護曰屈律啜曰阿波曰俟利發曰土屯曰俟斤曰洪達曰頡利發貴賤官兵凡二十等

泥利立與沙鉢略子雍虞閭連隋開皇中

雍虞閭約達頭舉兵攻染干

沙鉢略弟尙公主是爲啟人可汗

染干偕使臣長孫晟歸朝楊素史

萬里頻擊雍虞閭破之達頭敗敗吐谷渾泥利子達漫其母向氏本中國人生達漫而泥利卒向氏又嫁泥利弟婆實特勒婆實後與向氏詣長安遇達頭敗亂遂留京師達漫立號泥橛處羅可汗治烏孫舊地又立二小可汗分統所部一在石國北以制諸胡一在龜茲北其地名鷹娑川

今裕勒都斯婆一作婆

當大業初處羅

可汗撫馭無道其國多叛與鐵勒屢相攻大爲鐵勒所敗裴矩在西域召處羅

會兵攻吐谷渾國人不從適其酋長達頭之孫射匱遣使來求婚帝以裴矩言令發兵誅處羅然後爲婚射匱聞之喜興兵襲之處羅東走高昌保時羅漫山高昌王麴伯雅上狀因命裴矩將向氏親要之遂入朝國人乃立射匱爲可汗

達頭助雍虞閭兵得罪於隋乃奔吐谷渾死之其孫射匱微弱服屬處羅不得爲可汗至是立之

處羅後以從征高麗功賜號曷薩那可汗煬帝將復其故地以遼東之役未遑也射匱始開土宇建庭龜茲北之三彌山三彌山今汗騰格里鄂拉在伊犁河南東至金山西至雷翥海南至疏勒北至瀚海自焉耆西北八日行至其南庭自南庭又正北八日行至其北庭鐵勒龜茲及西域諸國皆附之與都陸弩矢畢葛羅祿處密處月伊吾諸種襍射匱卒弟統葉護可汗立統葉護男而有謀遂北并鐵勒西下波斯南接罽賓控弦數十萬霸有西勒域據舊烏孫之地又徙庭於石國北之千泉其西域諸國各命土屯一人監統之督其賦入唐武德初北突厥作患高祖厚加撫結與之并力以圖北蕃貞觀初爲其諸父莫賀咄所殺莫賀咄自立爲

屈利俟毗可汗初分統所既爲可汗國人不附弩矢畢共推泥孰莫賀設爲可汗泥孰不從時統葉護子啞力持勒亡在康居泥孰迎立之是爲乙毗鉢羅肆葉護可汗與俟毗分主其國衆悉附肆葉護雖俟毗之部亦稍稍去共以兵擊俟毗俟毗遁於金山爲泥孰所害衆奉肆葉護爲大可汗肆葉護大發兵征薛延陀反爲所敗心憚泥孰陰圖殺之泥孰遂入焉耆未幾沒卑達干與弩矢畢部謀廢肆葉護遁於康居憂死國人迎泥孰於焉耆立之是爲咄陸可汗泥孰父莫賀設本隸統葉護者死泥孰代之或曰伽那設立一年卒其弟同俄設立是爲沙鉢羅啞利失可汗九年遣使請婚帝慰而不俞俄而其國分爲十部號十設每設賜以一箭亦曰十箭又分十箭爲左右廂左五咄陸部置五大啜居碎葉東右五弩矢畢部置五大俟斤居碎葉西碎葉川今圖斯庫勒在伊犁河西號爲十姓部落然不爲衆所悅賴國人謀立欲谷設爲大可汗以啞利失爲小可汗未果十二年西部自立欲谷設爲乙毗咄陸可汗與啞利失中分自伊列河以西受

命於咄陸以東屬啞利失主之自是西突厥又分兩國矣乙毗咄陸又建庭於

鏃曷山西

案鏃曷山無攷今布喀鄂拉東薄伊犁河而又近北應即其境

謂之北庭厥越失拔悉密駁馬結骨火燭

觸木昆諸國皆臣之明年啞利失爲吐屯俟利發作難奔於鏃汗而死國人立其子爲乙屈利失乙毗可汗踰年死弩失畢大酋迎伽那設子畢賀咄葉護立之是爲沙鉢羅葉護可汗葉護立太宗詔使持節冊命賜鼓纛建庭雖合水北屯今哈博謂之南庭東薄伊列河龜茲鄯善且末吐火羅焉耆石史康諸國皆隸屬

是時乙毗咄陸寢盛二國交戰帝敕以敦睦令各罷兵乙毗咄陸不聽遣石國吐屯攻葉護殺之并其國弩矢畢不服叛去乙毗咄陸乃入寇伊州安西都護郭孝恪率精騎二千自烏骨狙擊敗之乙毗咄陸以處月處密兵圍天山而不克孝恪追北拔處月俟斤之城抵遏索山今哈屯博克達鄂拉在綏來縣南斬千餘級降處密部而歸後乙毗咄陸又殺部將泥孰啜爲其下胡祿屋所襲衆多亡逸畧盡乃保可賀敦城自輕出招叛亡阿悉吉闕俟斤逆擊之旣敗襲取白水胡城以

居弩矢畢不欲乙毗咄陸爲可汗遣使者至闕下請所立帝詔與國大臣擇可汗子孫賢者授之乃立乙屈利失之子爲乙毗射匱可汗射匱立發兵就白水胡城西城傳怛羅斯城西南贏二百里至白水城擊戰殺獲甚多乙毗咄陸自知不爲衆所容遂西走吐火羅國射匱遣使求婚帝令割龜茲于闐疏勒朱俱波葱嶺五國爲聘禮不克婚於是賀魯叛盡并可汗部落

賀魯者室黠米可汗土門子五世孫曳步利設射匱特勒却越之子也貞觀初彌

射步貞先後入朝乙毗咄陸可汗以賀魯代爲葉護居多斯川今額齊斯河直西州

北千五百里統處月處密姑蘇葛邏祿弩矢畢五姓之衆咄陸西走射匱立遣兵迫逐賀魯無常居部落散亡二十三年內屬詔拜瑤池都督處其部於庭州

莫賀城 宗初遣子啞運入宿衛帝遣還啞運勸賀魯引而西取咄陸故地建

牙於雙河顯慶中置雙河都督府今博羅塔拉及千泉自號沙鉢羅可汗統攝十姓尋以啞運爲莫

賀咄葉護遂寇庭州敗數縣詔遣梁建方契苾何力等合回紇五萬騎討之處

月朱邪弧注者附賀魯引兵據牢山建方等攻之衆潰斬弧注永徽四年罷瑤池都督府即處月地置金滿州漢金滿州又遣程知節爲葱山道行軍大總管率諸道進討是歲乙毗咄陸死其子真珠葉護與五弩矢畢請擊賀魯自効爲賀魯所拒不得前明年知節令前軍蘇定方擊賀魯別帳於鷹娑川斬獲甚衆賊棄鎧帳彌野怛篤胡城來降副總管王文度取其財屠之知節不能制顯慶二年擢定方伊麗同列道行軍大總管率燕然都督護任雅相副護蕭嗣葉瀚海都督回紇婆閏等窮討乃使彌射步真持節爲安撫大使分出金山道定方以精騎萬人至垓河今額彬格遜淖爾在綏來縣北西擊處木昆部敗之賀魯率十姓兵十萬來拒列陣而待定方與之交戰大敗之斬其首領二百餘人賀魯躡北五弩矢畢五咄陸皆降定方命嗣業婆閏趨邪羅斯川雅相踵後會大雪晝夜進至雙河與彌射步真會軍飽氣張距賀魯牙二百里陣而行抵金牙山賀魯真適臘定方兵縱其牙俘數萬人賀魯跳渡伊列水嗣業次千泉彌射至伊麗處月處密部皆

下次雙河賀魯先以步失達干據柵拒戰彌射攻之潰定方追賀魯至碎葉水盡奪其衆賀魯啞運將抵鼠耨設至石國今森葛爾境屬布魯特北蘇咄城旁被執至京師賀魯已滅列其地爲州縣以處諸部又置崑陵濛池二都護府以統之以應射爲興昔亡可汗兼崑陵都護領五咄陸部以步眞爲繼往絕可汗兼濛池都護領五弩矢畢部其役屬諸胡皆分置州西盡波斯並隸安西都護府濛射亦室黠米可汗五世孫在本蕃爲莫賀咄葉護與步眞有隙貞觀九年率所部處月處密入朝步眞自立爲咄陸部落不服去之亦攜族人來朝顯慶二年平賀魯彌射步眞皆爲可汗是歲彌射擊眞珠葉護於雙河斬之殺闕啜二人彌射步眞無撫馭材下多怨於是思結多曼率疏勒朱居波喝槃陀三國叛擊破于闐詔將軍將蘇定方討之都曼兵保馬頭川五年定方傳其城據降之龍朔初彌射步眞俱率所部從颶海道總管蘇海政討龜茲步眞誣言彌射欲反海政盡收殺之乾封時步眞死咸亨二年以西突厥部酋阿史那都支爲左驍衛大

將軍兼匐延都督以安輯其衆儀鳳中都支自號可汗與吐蕃連和寇安西詔裴行儉討之行儉計擒都支召執諸渠長降別帥李遮匐以歸時調露元年也西姓自是益衰其後兩部人日離散遂擢彌射子元慶爲左衛將軍步眞子步利失斛瑟羅爲右衛將軍盡襲其父所領及可汗號長壽中元慶爲來俊臣構謀反被誅流其子獻於振州明年其部人立倭爲可倭汗元慶子與吐蕃寇武威道王孝傑與戰破之聖歷二年以斛瑟羅兼平西道總管令鎮撫國人是時突騎施烏質勒兵盛斛瑟羅不敢歸與其部入內徙死長安擢其子懷道爲右武衛將軍長安二年以獻襲可汗兼北庭都護四年以懷道爲十姓可汗兼濛池都護未幾擢獻磧西節度十姓部落都擔叛獻擊斬之收碎葉以西帳落內屬突騎施陰伺邊隙故獻乞身入朝元宗不許方冊拜突騎施都督車鼻施啜蘇祿爲順國公而突騎施已圍撥換大石城將取四鎮會湯嘉惠拜安西副都護即發兵與獻共擊之終以蘇祿彊狠不能制亦歸死長安吐火仙敗始以

懷道子昕爲十姓可汗濛池都護昕至碎葉西俱蘭城爲突騎施莫賀達干所殺西突厥遂亡

突騎施烏質勒西突厥之別部初隸斛瑟羅下爲莫賀達干後諸胡歸附帳落寢盛乃置二十都督督兵各七千常屯聚碎葉西北漸攻得碎葉徒其牙居之

謂碎葉川爲大牙弓月城在伊列水東今哈什爲小牙其地東鄰北突厥西諸胡東直庭

州斛瑟羅入朝其部爲烏質勒所并卒子娑葛代統其衆詔立爲金河郡王旣而與其弟遮弩分治其部景三年遮弩叛歸北突厥默啜默啜自以兵二萬來討擒娑葛歸與弩遮俱殺之默啜兵還娑下都督蘇祿自立十姓部落悉歸附有衆二十萬遂雄西域之地開元三年册立爲忠順可汗乃以懷道女爲金河公主以妻之後蘇祿陰結吐蕃分寇四鎮而安西僅全始蘇祿愛治其人每有所得盡以予下故諸族附悅之爲盡力晚年愁窶不聊故鹵獲稍留不分下始貳矣又病風一支孿不事事於是有大首領莫賀達干都摩支兩部爲強盛

而種人自謂婆葛後者爲黃姓蘇祿部爲黑姓互相猜讐二十六年莫賀達干都摩支勒兵夜攻蘇祿殺之都摩支又背達干立蘇祿子吐火仙爲可汗居碎葉城引黑姓爾微特勒保怛羅斯城今塔拉斯共擊莫賀達干達干使告都護蓋嘉運率兵共討大破都摩支之衆臨陳擒吐火仙並收金河公而還以懷道子祿爲十姓可汗領突騎施所部莫賀達干曰平蘇祿我功也今立祿謂何即誘諸部叛詔嘉運招慰之遂命統其衆數年復以昕爲可汗祿至俱蘭城爲莫賀達干所殺自立安西節度收斬之天寶初突厥騎施部更以黑姓伊里底密施可汗至德後突騎施衰黑姓黃姓皆立可汗自相攻殺各遣使降附中國多故不暇治也乾元初黑姓可汗阿多裴羅猶能遣使者入貢大歷後葛邏祿盛徒居碎葉川二姓微至臣役葛邏祿斛瑟羅餘部附回鶻及其破滅有厖特勒居焉耆城稱葉護餘部保金沙領衆至二十萬唐末爲諸蕃所侵部族雖微亦常來朝貢五代之際最微又來不數故其長君史官皆不能紀

杜瓊紀行碎葉國從安西西北千餘里有勃達嶺嶺南是大唐北界嶺北是突騎施南界西南至葱嶺二千餘里其水嶺南流者盡過中國而歸東海嶺北流者盡歸胡境而入北海又北行數日度雪海其海在山中春夏常雨雪故曰雪海有細道傍往往有水孔嵌空萬仞轉墮者莫知所在勃達嶺北行千餘里至碎葉川其川東頭有熱海茲地寒而不凍故曰熱海西有碎葉城天寶七年北庭節度王正見薄伐城壁摧毀邑居零落昔交河公主所居止之所建大雲寺猶存其川西接石國約長千餘里川中有異姓部落有異姓突厥各有兵馬數萬城堡間雜日尋干戈凡是農人皆擐甲冑轉相虜掠以爲奴婢其川西頭有城曰怛羅城斯城石國人鎮之即天寶十年高仙芝軍敗之地從此至西海以來自三月至九月天無雲雨皆有雪水種田

石國

隋石國今哈喇境亦曰柘析本漢大宛北鄙東北至西突厥西北至波臘西南至

康國南至率都沙那界即東曹國東南去鏐汗五百里去冬州六千里王姓石氏城

之東南立屋置座於中正月六日七月十五日以王父母燒餘之骨金甕盛之置床上巡繞而行散以香花襍果王率臣下設祭焉禮終王與夫人出就別帳臣下以次列坐而饗宴國之右涯有素葉水而南有藥殺水入國中名眞珠河亦名質河地方千里土地平散多果實有粟麥多良馬南有大山生瑟瑟其君長嘗貳於突厥大業中突厥射匱破滅之以特勒匄職攝其國事唐貞觀間數

使朝貢顯慶二年拘送賀魯內屬以其地爲大宛都督府授其長爲都督開元初封石國王二十八年磧西節度使蓋嘉運率其王莫賀咄吐屯擊吐火仙破碎葉城以功册封順義王明年請討大食不許天寶初封王子那俱車鼻施爲懷化王久之安西節度使高仙芝劾其無蕃臣禮請討之王約降仙芝遣使者護送開遠門斬關下於是西域咸怨王子走大食乞兵攻怛暹斯城敗仙芝軍自是臣大食

沙陀

唐沙陀今迪化州北境以沙磧爲名西突厥別部處月種也貞觀七年太宗立泥孰爲可汗而族人步眞缺望謀并其弟彌射自立彌射懼率處月等入朝步眞自爲葉護勢窮亦率衆歸朝其留者乙毗咄陸可汗以賀魯代爲葉護統之時咄陸建庭鏃曷山而處月處密又隸屬之處月居金婆山之陽蒲類之東有大磧名沙陀號曰沙陀突厥咄陸寇伊州引處月處密兵圍天山郭孝恪擊走之拔處月俟斤之

城迫咄陸敗奔吐火羅賀魯來降處月朱邪闕俟斤阿厥亦請內屬始置瑤池都督府以賀魯爲都督永徽二年賀魯叛而朱邪孤注亦殺招慰使都尉單道惠據據牢山以守今阜康縣北山是時射脾俟斤沙陀那速不從高宗以賀魯所統授之明年弓月道大總管梁建方率契苾何力等引兵斬孤注俘九千人又明年廢瑤池都督即處月地置金滿沙陀二州皆領都督賀魯敗彌射爲安撫大使次伊列水而處月來歸乃置崑陵都護府統五咄陸部以彌射爲都護龍朔初處月酋沙陀金山從薛仁貴討敗鐵勒九姓長安二年進爲金滿州都督金山卒子輔國嗣先天初避吐蕃徙部北庭率其下入朝開元二年復領金滿州都督累爵永壽王卒子骨咄支詞天寶初回紇內附以骨咄支兼回紇副都護從肅宗平安祿山特進驍衛上將軍卒子盡忠嗣至德寶應間中國多故北庭西州閉不通朝奏使皆道出回紇而虜多漁擷尤苦之雖沙陀倚北庭亦困其暴斂貞元中沙陀部七千帳附吐蕃與共寇北庭陷之吐蕃徙其部於甘州以盡

忠爲軍大論吐蕃寇邊常以沙陀爲先鋒久之回紇紇改取涼州吐蕃疑盡忠持兩端議徙沙陀于河外舉部愁怨盡忠與朱邪執宜謀曰我世爲唐臣不幸陷汚今若走蕭關不愈于絕糧乎執宜曰善元和三年悉衆三萬落循烏德鞬山而東吐蕃追之行且戰旁洮水奏石門轉鬪不解部衆略盡盡忠死之執宜哀廢傷士裁二千騎七百歛靈州塞節度使范希朝以聞處其部於鹽川置陰山府以執宜爲府兵馬使盡忠弟葛勒阿波率殘部七百叩振武降授左武衛大將軍兼陰山府都督執宜朝長安議者以靈武迫吐蕃恐後反覆頃之希朝鎮太原因詔沙陀舉軍從之希朝乃料其勁騎千二百號沙陀軍置軍使而處餘衆於定襄川執宜乃保神武川之黃花堆更號陰山北沙陀是仍其名而實非舊地也

執宜禦邊素立功授招撫使卒子赤心嗣賜姓李名國昌國昌子克用封晉王克用子存勗滅朱友貞復唐祚是爲唐莊宗

回鶻

唐回鶻本回紇建中間頓莫賀立易名回鶻言捷鷲如鶻然安西北庭自天寶

未失關隴朝貢道隔伊西北庭節度使李元忠四鎮節度使郭昕遣使奉表皆不至貞元二年元忠等所遣假道回鶻乃得至長安帝進元忠爲北庭大都護昕爲安西大都護自是道雖通而回鶻求取無厭沙陀別部六千帳與北庭相依亦厭哀索王三葛祿白眼突厥素臣回鶻者允怨苦皆密附吐蕃六年吐蕃因沙陀共寇北庭回鶻酋頡于迦斯與戰不勝北庭陷都護楊襲古引兵奔西州回骨以壯卒數萬召襲古將還取北庭爲吐蕃所擊大敗土死大半襲古奔還迦斯又給襲古至帳下殺之葛祿又取深圖川深是浮字之訛回鶻大恐稍南其部落以避之是歲回鶻又擊吐蕃葛祿於北庭勝之來獻俘元和中回鶻使來請婚未報可汗以三千騎至鷓鴣泉於是振武以兵屯黑山治天德城備虜穆宗立詔以太和公主下降册拜回鶻爲可敦如后稱也是時裴度方伐幽鎮回鶻使渠將李義節以兵三千佐天子平河北不聽兵已至豐州厚賜而還開成四年其相握羅勿作難引沙陀共攻可汗可汗自殺國人立匭馭特勒爲可汗未即命

武宗即位以嗣澤王溶告乃知其國亂俄而渠長句錄莫賀導黠戛斯合騎十萬攻回鶻城殺可汗誅掘羅勿焚其牙諸部潰其相馭職與厖特勒十五部奔葛祿殘衆入吐蕃安西於是可汗牙部奉烏介特勒爲可汗南保錯子山黠戛斯已破回鶻得太和公主又自以李陵後與唐同宗故遣使者達干奉主來歸烏介追擊達干殺之劫主南度磧進攻天德城振武節度劉沔拒却之宰相李德裕言回鶻曩有功今饑且亂可汗無歸不可擊宜遣使贍安之帝用李拭行邊刺狀於是其相赤心與王子嗚沒斯特勒那頡啜將其部欲自歸而公主亦遣使來言烏介已立因請命又大臣頡于伽思頡于迦斯又一人表假振武居公主可汗帝不可詔使者持册往潛稽其行明年回鶻奉主至漠南入雲朔剽橫水殺掠甚衆轉側天德振武間乃召諸道兵合討嗚沒斯以赤心好桀難得要領密約天德戍將田牟誘赤心斬帳下那頡啜收赤心衆東走振武大同因室韋黑沙南闕幽州節度使張振武破之悉得其衆那頡啜走烏介執而殺之然烏介

兵尙強駐牙大同北閭門山而特勒厖須遮阿敦寧等四部因仲武降嗚沒斯亦附使者送款帝欲使回鶻復國而烏介已攻雲州劉沔戰敗之嗚沒斯率部衆及特勒大酋二千詣振武降詔拜嗚沒斯爲懷化郡王以天德軍爲歸義軍即拜歸義軍使其下並爲將軍有差命李德裕采秦漢以來興殊俗効忠卓異者凡三十人爲異域歸忠傳寵錫之温沒斯請留族太原帝命劉沔列舍雲朔間處其家烏介遣使者藉兵欲還故庭且假天德城帝不許烏介恚進略大同川轉戰攻雲州詔發諸鎮兵屯太原以北賜沒斯旣朝賜姓李皆氏名嗚沒斯曰思忠於是詔劉沔爲回鶻南面招撫使思忠爲西黨項都大將西南招討使又詔銀州刺史何朝清兵出振武與沔仲武合稍逼回鶻思忠數深入以諭降其下沔等與回鶻屢戰破之天德行營副使石雄擊追烏介至殺胡山遇公主奉主還降特勒以下衆數萬烏介往依黑車子爲其所殺其下又立其弟遏捻特勒爲可汗是時思忠等以國亡皆願八朝見德遂罷歸義軍而遏捻特勒哀

其殘衆五千仰食於奚大中初仲武討奚敗之回鶻寢耗滅所存名王貴臣五百餘轉依室韋遏捻懼夜馳九騎委衆西走部人皆慟哭諸蕃自給稍歸厖特勒是時厖特已自稱可汗居甘州有磧西諸城宣宗復册拜回鶻可汗懿宗時大酋僕固俊自北庭擊吐蕃斬論尙熱論吐蕃官屬尙熱名盡取西川輪臺諸城使米懷玉來獻俘昭宗幸鳳翔靈州節度韓遜表請回鶻率兵赴難帝以韓偓言遂不報偓曰虜自會昌時向邊羽翼未成不得逞今乘我危以冀幸端不可開也然其國卒不振時時以王馬與邊州相市云五代之際有居甘州西州者嘗見中國而甘州回鶻數至其俗可汗尙樓居妻號天公主國相號媚祿都督見可汗則去帽披髮而入以爲禮婦人總髮爲髻高五六寸以紅絲絹囊之旣嫁則加氈帽又有別族姓龍家俗小異自後唐明宗時以馬市中國其所齎寶玉皆鬻縣官而民犯禁爲市者罪之周太祖弛其禁民得與回鶻私市宋太平興國中使招諭沙州回鶻可汗外甥賜以器幣招致名馬美玉以備車騎琮璜之用天禧二年高昌都督安信等來朝四年又遣使偕

龜茲國來貢方物自端拱至天禧間有甘州回鶻秦州回鶻又有賀蘭山四族並夜落紇者朝貢不絕初回鶻西奔族衆散處故

甘州有可汗王西州有克韓國新復州于闐有黑韓王皆其後焉宣和中因入貢

散而之陝西諸州公爲貿易留久不歸朝廷慮其習知邊事且往來經夏國非

便乃立法禁之

唐中受降城入回鶻道中受降城正北如東八十里有呼延山谷南口有呼延柵谷北口有唐歸棚車道也入回鶻使者所經又五百里至鷓鴣泉又十里入磧經口鹿山鹿耳山錯里山八百里至山燕子井又西北經密粟山韃旦泊野馬泊可汗泉橫嶺綿泉橫泊七百里至回鶻牙帳又別道自鷓鴣泉北經公主城眉間城怛羅斯山赤崖鹽泊渾義河爐門山木燭嶺千五百里亦至牙帳東有平野西據烏德韃山南依崑崙水北六七百里至仙娥河河北岸有富貴城又正北如東歷雪山松樺林及諸泉泊千五百里至骨利幹又西十三日行至都播部落又北六七日至堅昆部落有牢山劍水又自牙帳北渡仙娥河東北二千里至室韋回鶻有延啞伽水一曰延特勒泊亦曰延特勒那海烏德韃山左右崑崙河獨羅河皆屈曲東北流至牙帳東北五百里合流泊東北千餘里有俱倫泊泊之四面皆室韋

黠戛斯

黠戛斯古堅昆國地當伊吾之西北白山之旁其種襍丁零乃匈奴西鄙也匈奴封漢將李陵爲右賢王衛律爲丁零王後郅支單于破堅昆於時東距單于

庭七千里南車師五千里鄧支留都之後世得其地者訛爲結骨或曰居勿亦曰紇圻斯衆數十萬南依貪漫山地夏沮洳冬積雪人皆長大赤髮皙面綠瞳以黑爲不詳黑瞳者必曰陵苗裔也唐初號強國地與突厥等突厥以女妻其酋豪東至骨利幹南鐵勒西南葛邏祿薛廷陀強以頡利發一人監其國未始與中國通貞觀二十二年聞鐵勒等臣服遂入朝帝以其地爲堅昆府拜其酋長失鉢屈阿棧爲都督隸燕然都護自是朝獻不絕乾元中爲回骨所破不能通中國後狄語訛爲黠戛斯蓋回鶻謂之若曰黃赤面云然常與大食吐蕃葛邏祿相依仗吐蕃之往來者畏回鶻剽劫必住葛邏祿以待黠戛斯護送回鶻授其酋長阿熱爲毗迦頓頡斤阿熱駐牙青山至回鶻牙所橐駝四十日行使者道出天德右二百里許抵西受降城北三百里許至鷓鴣泉泉西北至回鶻牙千五百里許而有東西二道泉之北東道也回鶻牙北六百里得仙娥河河之東北曰雪山地多水泉青山之東有水曰劍河偶艇以渡水悉東北流經其

國合而北入於海東至木馬突厥三部落曰 播曰彌列哥曰餓支其酋長皆爲酷斤樺皮覆室多善馬俗乘馬馳冰上以板籍足屈木支腋蹴輒百步執迅激夜鈔盜晝伏匿黠戛斯得以役屬之回鶻稍衰阿熱即自稱可汗回鶻遣帥伐之拏鬪不解阿熱恃勝肆詈之曰我將於爾帳前馳我馬植我旗能抗爾亟來不能當疾去阿熱自將焚其矛乃得太和公主遂徙矛牢山之南牢山亦曰賭蒲距回鶻舊牙度馬行十五日阿熱以公主唐貴女遣使衛送還朝回鶻烏介邀取之并殺使者會昌中遣使上書言狀行三歲至京武宗大悅詔宰相就鴻臚寺見使者使譯官考山川國風以上命趙蕃持節臨慰其國是時烏介收餘衆託黑車子東奚部阿熱願乘秋馬肥擊取之表天子請師且言攻取安西北庭帝亦以河隴四鎮久淪戎狄幸回鶻破弱吐蕃亂相殘齧可乘其衰朝議皆不可乃止

李德裕傳帝欲從點戛斯求安西北庭地德裕曰不可安西距京師七千里北庭五千里異時由河隴右抵玉門關我郡縣往往有兵故能緩急調發自河隴入吐蕃則道出回鶻回鶻今破滅未知黠

戛斯果有其地耶假令安西可得即復置都護以萬人往戍何所興發何道饋輓
彼天德振武於京師尤苦力不足况七千里安西哉臣以爲縱得之無用乃止

大中咸通間三來朝然卒不能取回紇後之朝聘册命史臣失傳

回紇五城

謙州

謙州今古在吉里吉斯東南謙河唐書作劍河西南唐嶺麓之地相傳汪罕始居

地克烈部汪罕名托里受金封爵爲王蕃音重稱爲汪罕居民數千家悉蒙古回紇人有工匠數局蓋元初所

徙漢人也地沃衍宜稼夏種秋成不煩耘耔云

益蘭州

益蘭蛇之稱初州境山中居人見一巨蛇長數十步從穴中出飲河水腥聞數
里因以名州至元初劉好禮爲吉里吉斯謙州等處五城斷事官即於此修庫
廩置傳舍以爲治所民俗皆以杞柳爲杯皿剗木爲槽以濟水不解鑄冶好禮
聞於朝乃遣工匠教爲陶冶舟楫焉

吉里吉斯

吉里吉斯南去大都萬有餘里相傳奈曼舊音部始居此元初析其民爲九千

戶其境長一千四百里廣半之謙河今額爾齊斯郭勒經其中西北流又西南有水曰

阿蒲東北有水曰玉須皆巨浸也會於謙而注於昂可刺河昂可刺水名即以名其國在吉里斯北唐骨利

也幹北入於海俗與諸國異其言語則輝和爾同廬帳而居隨水草畜牧頗知田

作遇雪則跨木馬逐獵土產名馬白黑海東青至元二十六年以吉里吉斯戶居和林七月帝親征海都發所屯吉里吉斯軍

北征

烏斯

烏斯以水名在吉里吉斯東謙河之北其俗每歲六月上旬刑白馬牛羊灑馬

湏咸就烏斯沐以祭河神爲其始祖所從出故也

撼哈納

撼哈納猶言布囊也蓋口小腹巨地形類此因名在烏斯東謙河之源所從

出其境上惟有二山口可出入叢山林樾險阻爲甚野獸多而畜字少民無
恒產以樺皮作廬帳取鹿乳採松實及鬪山丹藥芍根爲食月亦乘木馬出
獵

嶺北行省

元和林西有哈喇和屯河以名城太祖十五年定河北諸郡建都於此太宗七
年乙未春城和林築萬安宮南有涼樓曰托古斯西有金山曰按台山阿勒坦

丁酉築掃鄰城作迦堅茶寒殿戊戌營圖蘇湖作迎駕殿憲宗即位於鄂倫淖

爾舊音幹難河
今迪化州乃以旺綽爾舊音晃
兀兒留守和林中統以前五朝都焉世祖都中興

開平郡 阿里克布克世祖弟 搆亂遂僭位於和林城西按台河帝親將征之始于和

林置宣慰司元帥府

耶律希亮傳憲宗在六盤山希亮詣行在所已而交鑄扈從南伐希亮從行明年憲宗崩于蜀希亮
將輜重北歸陝右又明年爲中統二年世祖即位阿里克布克及遣使召主將渾都海鑄說渾都海
入朝不從鑄棄妻子歸大都渾都海遣騎追之不及乃使百人監視希亮母子迫脅使從行自靈武
過英吉利城至西涼甘州阿里不哥遣將阿拉克岱爾自和林帥師至焉支山希亮見之阿蘭荅爾

免其監位既而阿蘭荅爾渾都海爲大兵所殺其殘卒北走衆推哈喇布哈爲帥希亮潛匿甘州北黑水東沙陀中殿兵已過十餘里有尋馬者至老婢漏言衆奄奄至驅至肅州哈喇布哈與鑄有舊釋希亮縛及摘沙州北川希亮與兄弟徒步負乘不火食者數日是冬涉雪踰大山至北庭都護府三年至昌巴里城夏踰瑪納斯河摘葉密里城乃定宗潛邸湯沐之邑也時六皇后之妹主后位與宗王呼喇特皆欲東覲希亮密知之擄希亮入見已而事不果冬至于和博克□□□之地四年定宗子大名王憫其不能歸遺以幣帛鞍馬乃從大名王至誅阿里不哥所用鎮守之人蘇爾哈欲附世祖復從二王還至葉密里城五月又爲阿里不哥所驅西行一千五百里至博勒克薩里□□□□□之地六月又西至□□□□□之地又從至布喀□□□城又西行六百里至哲爾格鄂拉后妃輜重皆留於此希亮母及兄弟亦在焉希亮單騎從行二百餘里至察畢圖爾城又百里至阿里瑪圖□□□城而哈喇布哈兵奄至希亮又從二王興師還至布喀城與哈喇布哈戰大敗之盡殲其衆二王乃函其首遣使報捷十月至于阿斯哈庫勒五年至哈什哈里阿里不哥兵復至希亮又從征呼巴什時希亮母從后避暑于阿里巴什哈雅先是鑄嘗言于世祖臣之妻子皆在北邊世祖遣使至二王所召希亮詣闕六月由庫森城至哈喇和卓出伊州涉大漠以還八月入覲于上都之大安閣所著有從軍紀行錄

至元八年立轉運司以小雲什伯爲使兼提舉交鈔十二年海都叛奔以皇子

北平王統罕

舊音南
尤合

建幕于和林北之阿穆爾

舊音阿
力麻里

其明年昔里吉劫北平

以叛率西道諸王至和林城右丞相伯顏軍往禦之私立元昌路十八年分元帥府於金山之南和林止設宣慰司二十六年海都等復侵邊宣慰司怯伯同知奈曼臺副使巴什伯爾乘間皆叛應之

元史西北附錄注阿特穆爾諸王海都行營憲宗二年分地自上都西北行六十里至回鶻五

城唐號北庭置都護府又西北四千里至阿特穆爾至元□□年都護叛世祖逆敗之于北庭又追至阿特穆爾則又遠遁上令弗追以皇子納罕統諸軍于阿特穆爾以鎮之命丞相安童往輔之本紀至元十四年諸王悉昔里吉劫北平械擊安童脅諸王以叛使通好于海都海都弗納遂率諸王至和林十九年北平王仍鎮軍于阿特穆爾以禦海都昔里吉與托穆爾撒里蠻謀劫北平以叛欲與托刺忽結援海都海都不從撒里蠻侮過北平遣扎刺忽以聞二十一年皇子納罕至自北邊以至元十二年建幕于阿特穆爾留十年始歸二十六年海都復叛

七月帝親征命

伯顏出鎮和林伯顏尋以中書省右丞相知樞密院事將北邊諸軍和林始置知院元貞初選各衛精兵千人命孛羅喝荅將之戍和林城聽太師月爾魯節度三年而更大德二年復置宣慰司都元帥府武宗即位始置和林行中書省及稱海等處宣慰司都元帥府遂罷和林宣慰司而立總管府初置行省右丞相以伊徹察喇察兒舊音月為行省右丞相哈喇哈遜為行省左丞相至大四年省

右丞相

伊徹察喇傳初金山南北叛王海都篤哇據之垂五十年時入為寇嘗命親軍統左右部宗王諸帥屯列大軍備其衝突大德五年伊徹察喇副娃王以督之是年海都篤哇入寇伊徹察喇先出

敵背一軍隨之大軍五隊合擊大敗之海都篤哇遁去伊徹察喇亦罷兵歸鎮厥後篤哇來請臣附時武宗亦在軍從伊徹察喇議許之既遣始以事聞由是叛人稍稍來歸十年冬明哩特穆爾等屯於金山武宗師師出其不意伊徹察喇繼往壓之以威啖之以刑明哩特穆爾降部人驚潰遣圖滿將萬人深入其部人亦降察巴爾海都長子也海都死嗣領其衆至是掩取其部人凡兩部十餘萬

口至大元年伊徹察爾喇遣使奏曰昔者篤哇失衆請和雖死宜遣使安撫其子款徹使不我異又諸部既已歸附我之牧地不足宜處諸降人于金山之陽吾軍屯田金山之北軍食既饒又成重戍就彼有謀吾已擣其心腹矣奏入帝曰甚善鄉宜移軍□□□地伊徹察爾既移軍察巴爾喇古勒果奔款徹不見納去留無所相率來降于是北邊始寧詔立和林等處行中書省哈喇哈遜傳以太傳左丕相行和林省事至鎮分使者賑降戶奏出鈔帛易牛羊以給之近水者教取魚食會大雪民無取得食命諸部置傳車相去各三百里凡十傳轉米以餉飢民不足則益以牛羊又度地置內倉積粟以待來者浚古渠溉屯田數千頃治稱海屯田

仁宗初改和林省爲嶺北等處行中書省改和林總管府爲和寧路統有北邊等處

皇慶初命行省右丞□
□經理稱海屯田

天歷二年明宗即位于和林之北四月以那海爲

嶺北行省平章政事御史言嶺北行省控制一方廣輪萬里實太祖肇基之地國家根本繫焉方面之寄豈可輕任塔即吉素非勳舊羅力又市井小人不諳政務並宜罷斥帝甚嘉納遂命雅克特穆爾升用行省官吏八月帝次呼忽罕

察都爾

舊音忽察多

暴崩

元本紀大德三年武宗總北軍邊戰海都死封爲懷寧王十年北邊悉平帝自金山至于和林諸王畢會五月至上都即位明宗武宗長子也大德三年

命撫北軍武宗立乃立仁宗爲皇太子命以次傳於帝仁宗延祐三年議立英宗爲皇太子太后幸臣□□□等譖封帝爲周王出征雲南帝至延安遇□□□等發兵自潼關至河中府帝遂西行至北邊金山西北率衆來附帝至所部與定約每歲冬居□□夏居□□春則命從者耕于野泥十餘年邊境寧謐英宗至治三年鐵失等弒逆晉王依遜特穆爾自立改元泰定二年帝弟懷王出居建康三年

秦定崩燕特穆爾謀義迎立帝帝方在遠漠恐生變乃迎懷王於江陵九月懷王即位改元天歷遣使來迎地至金山嶺北行省潑皮武寧王察撤圖等繼至二年正月懷王遣撤廸等來迎帝即位于和寧之北四月立懷王爲皇太子以那海爲嶺北行省平章政事八月車駕次呼罕察都爾之地皇太子來迎入見是日晏諸王大臣於行殿越四日帝暴崩皇太子即位是爲文宗

文宗至順

元年以哈巴爾圖爲平章政事尋罷斥以上部留守奈曼臺行嶺北行省樞密院事順帝後至元中兵起汝穎天下震動帝履詔宗王以北方兵南討阿魯輝乘間擁衆數萬屯於圖爾古烏撒之地

舊音木兒古兀出

以叛命圖堅特穆爾等擊之

行至稱海起哈喇赤萬人爲軍其人素不習爲兵一旦驅之使戰兵猶未戰皆脫其衣奔阿魯輝軍中圖堅敗績單騎還上都二十一年更命少保知樞密院老章以兵十萬擊之且俾阿魯輝之弟和圖特穆爾從征大敗之阿魯輝謀東遁其部將脫歡知其勢窮乃與宗王等擒送闕下于是加老章太傅以脫歡知行省樞密院事仍以和圖襲封陽翟王

阿魯輝太祖子明哩大王之裔明哩三傳至圖古璠至大元年封陽翟王俾鎮北蕃又三傳至

阿魯襲封

尋又詔加老章和寧郡王以嶺北行省丞相知行樞密院事俾鎮北蕃明

年初愛猷識理達喇北走和林

順帝子

擴廓特穆爾從之擴廓一名王保保健將

也數侵甘肅洪武五年徐達爲征虜將軍出鴈門趨和林擴廓與賀宗哲合兵拒達于嶺北達軍敗績詔還師擴廓從其主徙金山卒于哈喇那海之衙庭元國公脫火赤又屯和林擾邊十三年命沐英總領陝西兵出塞略亦集乃路漢居延塞元于此置路有合即渠今甘州北一千五百里登賀蘭山涉流沙七日至其境擒脫火赤護全部以歸是冬愛猷識理達喇卒子抱古斯嗣帝遣使往弔爲文祭之二十一年藉玉等擊托古斯于捕魚爾海托古斯西遁將依丞相咬住于和林行至圖古喇舊音土刺河爲其子雅素特爾所襲衆遂散咬住來迎欲共往依庫克特穆爾大會雪不得發雅素特爾兵猝至搯殺之并殺其子天保奴自托古斯五傳至坤特稱穆爾咸被殺不復知其名有鬼力赤篡立稱可汗遂號韃靼云

瓦剌

明瓦剌居嶺北全境東接韃靼元亡其強臣猛可帖木兒據之死衆分爲三其渠曰馬哈木曰太平曰把秃孛羅永樂初數使招諭并賜馬哈本等文綺有差

六年馬哈木等遣暖荅失隨亦刺思來朝明年乃封馬哈木爲順寧王太平爲賢義王托秃孛羅爲安樂王賜誥印自是名曰瓦剌歲一入貢時元裔本雅失里偕其屬阿魯台居漠北馬哈木以兵襲破之十年攻殺本雅失里尋以甘肅寧夏歸附韃靼者多其所親請給還帝怒命中官海童往輸責之冬馬哈木擁兵飲馬河將人犯而揚言襲阿魯臺開平守將以聞帝遂親征大軍至忽蘭忽失溫三部掃境來戰帝親馳擊大敗之斬其王子十餘人部衆數千追奔度兩高山至土刺河馬哈木遁乃班師明年馬哈木與阿魯戰敗走未幾死海童歸言瓦剌拒命由順寧順寧死賢義安樂皆可撫帝因復使海童往老太平把秃孛羅十六年馬哈木子脫歡襲爵自是瓦剌復奉貢其後瓦剌部屬賽因達拉來降命爲所鎮撫賜綵幣仍令有司給供具自是來歸者如例宣德元年太平死子捏烈忽嗣時脫歡與阿魯台戰敗遁毋納山察罕腦爾問九年脫歡襲殺阿魯台遣使來告且請獻玉璽却之未幾脫歡內殺賢義安樂兩王盡有其衆

欲自稱可汗衆不可乃共立脫脫不花以先所併阿魯台衆歸之自爲丞相居漠北哈喇噴等部便屬焉正統四年脫歡死子也先嗣稱太師准王是於北部皆服屬也先脫脫不花具空名不復相制每入貢主臣並使朝庭兩敕答之賜賚甚厚也先攻破哈密執王及王母旣而歸之又結婚沙州赤斤衛破兀良哈脅期鮮邊臣知必爲大寇疏入止敕防禦而已時也先求中國財物無不許故事瓦剌使不過五十人以利爵賞歲增至二千人至是來使三千人復虛其數以冒領餼廩禮部覈實予之也先大恚遂誘諸部分道入寇也先從大同入太監王振挾帝親征車駕于土木城陷焉六軍大敗死傷數十萬也先擁帝而去也先事備詳史傳不具錄郕王即位也先詭稱奉上皇歸由大同抵紮荆關直犯京師尙書于謙武清伯石亨都督孫鏜禦之也先戰敗大掠而去仍以上皇北行初也先有輕中國心及犯京師見中國兵威始大沮會中國已誘誅賊奄喜寧失其間謀而脫脫不花阿剌知院與朝廷和皆撤所部歸也先亦一意息兵景泰元年

迎上皇歸歲來貢獻帝絕之不復遣使也先與脫脫不花內相猜脫脫不花妻也先姊也先欲立其姊子不聽也先疑其將謀已遂攻殺脫脫不花執其妻子以其人畜給諸屬遂乘勝迫脅諸蕃四年冬也先自稱田盛大可汗以其次子爲太師來朝六年阿剌知院攻也先殺之韃靼部孛來復殺阿剌奪也先母妻并其玉璽也先諸子火兒忽答徙居干趕河其弟伯都王姪兀忽納等往依哈密伯都哈密王母之弟也英宗復辟三年哈密爲請封詔授伯都王都督僉事兀忽納指揮僉事也先旣死瓦剌衰部屬分散天順中阿失帖本兒屢使入貢其後有拜亦撒哈者有克捨者克捨頗強數糾韃靼小王子入寇尋卒養罕王稱雄擁精兵數萬克捨弟阿沙爲太師成化二十三年養罕謀犯邊哈密罕愼來告養罕不利去憾哈密兵還掠其大土刺宏治中稱太師者一曰火兒忽力一曰火兒古倒溫皆遣使朝貢土魯番據哈密都御史許進以金幣厚啗二部令以兵擊走之其部長卜六王屯駐把思闊正德十三年土魯番犯肅州守臣

陳九疇使卜六王乘虛襲破土魯番三城殺擄萬計土魯番畏逼與之和嘉靖九年復以請婚相仇隙土魯番益強瓦剌數困敗所部又輒自殘多歸中國哈密復乘間侵掠而卜六王不支亦求內附朝廷不許遣出關